

MARKO

Ditiki Sɛɛ Nə Marko Lɛwɔni

Ntufləsətidi Yohanes Ábe Letsya Itsyi Lə Ditiki Sɛɛ Nəmə Ɔsuə.

¹ Nyamfo ni Ditiki Sɛɛ itsyi lə Yesu Kristo wə ni Onanto kosate eto ubi əsuə eto ketsyikokɔ.

² Lə lefe kentsyɛ nə léfe məə, Onanto eto unyələkətidi Yesaya áwɔni utsyə nkə Onanto átɛyi wə ubi nkə,

“Mootsyese ɔtɔyɛ ntɔnsə.

Wə loɔɔ betidi utsyə itə fə bubə.

³ Ɖbɔɔ se nkomə eto utidi əmfo luusu kabe letsya lə mfiminti akatɛyi nkə,

‘Bimuə əsuə bitsyə itə Bonamute əmə.

Bimuə əsuə kukɔɔ itə wə bubə.’ ”

⁴ Nko eto ɔtɔyɛ əmə ni Yohanes. Wə ni díbə ɔkɛ lə mfiminti kaka úkəfləsə betidi ntu lə ketu fe kase Yudafo leeyifo. Nya ɔnlɛ bofa kabe letsya nkə ele bə betidi tɛyi mə akɔəsi bawuninsə lə baye asa bua buyifo lə bafo ntu fləsəfləsə eto lekpa lə Onanto lə ufi mə abua ɔtsyɛ mə. ⁵ Betidi kpə etsyi Yudea eto kasɔ ku mə umənkplɛ wə baakpo Yerusalem nya bésu mfiminti bomfó bə lə banɔ Yohanes eto kɔtɔ ko bákpe wə eto etiki. Bələkə mə abua báte Onanto nya Yohanes dífləsə mə ntu lə ketu ka baakpo Yordan.

⁶ Yohanes ákpe ɔflimu eto bisə eto awudindi nya úfi kubukikuə eto abɔsu ókle wə nkɛ. Didisa nə úkədi didi bablɔ ku bəkpəsə.

⁷ Wə etiki nnya ɔnlɛ ditsya bobɛ ni nkə, “Utidi wə ntəkə mɛ kama ɔnlɛ bubəə, so mɛ famfamfa nya yənyə itə bə nyə lə wə kɛnyɛ nyifo wə keyifo blɛmblɛ. ⁸ Mɔɔ, ntu eto bufləsə eto lekpa ete maafɔ buyifo. Fɛɛ wə ebufi Onanto eto Lɛwɔnɔ ufləsə mi ntu.”

Yohanes Ɛfləsə Yesu Ntu.

⁹ Yanklɛ fɛ Yesu ditsyi umə wə baakpo Nasaret lə Galilea eto kasɔ, ubə udufə, nya Yohanes diyifo wə ntufɛsɛfləsə eto lekpa lə Yordan. ¹⁰ Lə kase Yesu nlɛ bobɔ lə ntu bomə əsuə kabe katoɔ, ɔnyə nkə Onanto eto kato lɛ bɔsini nya Onanto eto Lɛwɔnɔ lɛyifə dɪsiə lə wə əsuə lə lɛblekpa eto ditsyɛbi əsuə. ¹¹ Nya bɔnɔ ɔkuɛ ditsyi kato ɔnlɛ bɔtɛyi nkə, “Fə ni mɔ ubi wə mankeko, nya məənyə disuəyuə lə fə.”

¹² Lamfolamfo, Onanto eto Lɛwɔnɔ ákpa Yesu úsuko mfiminti bomə kafo. ¹³ Wə mate əsiə mfó eyifosi ana. Lə lefe nɛmfó əsuəə, Obonsam áto Yesu óbe. Nya Onanto eto batɔyɛ díbə bawunsə ko wə.

Yesu Ɛləkə Wə Bakasebi Tutɛ.

¹⁴ Lə lefe nə bəmuə Yohanes bákpe lə Aba eto diyoo, Yesu édu mfó úsu Galilea úsu údi Onanto eto Ditiki Sɛɛ nɛmə mfó.

¹⁵ Ɔkɛ mfó katɛyi nkə, “Lefe sɛɛ nɛmə eboyo. Onanto eto sekakedikɔ eto lefe əbɔfi. Bisinkli lə mi asa bua eto kama lə befo Ditiki Sɛɛ nɛmfɔ bɛnɔ.”

¹⁶ Se Yesu nlɛ bɔtsylama lə ditumbukplɛ nə nkpe lə Galilea eto kasɔ ɔflɔɔ, ɔnyə mba ləələkə akpɛ inuə, ba ni Simon ku wə ɔyimisani Andreas, ba nlɛ mə asabu bota mfó.

17 Nya Yesu leteyi mə nkə, “Bibə bitəkəko mə idu mómó entóó, nya moote mi kase biuləkə betidi bitə Onanto.” 18 Lamfolamfo báyani mə asabu bətsyə nya bātaka bətəkəko wə.

19 Joyce úsu setó seke nya únyə bayimisani inuə bətsyuə ba ni Sebedeo eto bebi ba ni Yakobo ku Yohanes. Besi mə okló kafo balé mə asabu bəlo. 20 Kase Yesu dinyə mə koo, ókpadi mə nkə bətəkəko wə. Mə tsya átaka akpa akpa báyani mə anto Sebedeo ku wə beyifoyifo bətsyə lə okló əmə kafo bətəkəko Yesu.

Yesu Ála Ləwóno Bua Lə Osani Utsyuə Ísuə.

21 Yesu ku mba ntəkəko wə ésu bédufə umə wə baakpo Kapernaum. Nya lə Yudafo eto Onwéditsyayi nə ntəkə lə mə mfó eto busu əsuə eto kamaa, Yesu ésu Yudafo eto katsyako nya útsyiko mə Anantotiki bote. 22 Iyifo mba kenke leno wə asatete nyamə yanii, itsyise ebó lete lə mba laate asa itsyi lə Yudafo eto afi əsuə. Bomu wə asatete eyifo nnya nkpe kalende nya itsyi taa wə utu kəmiə.

23 Lə lefe nəmə tutuutuu, osani utsyuə ləwóno bua nsi wə lə əsuə aké lə katsyako kamə mfó, 24 nya ófa bembembe ótəyi nkə, “Yesu Nasaret-nyə, be fanlé bəbəbə ketsyiko lə bo ofló mfo? Bubə fəbə fə əəbə atsylosə bo lee? Nyi futsyə feni. Fə ni Onanto eto Okenkenyə wə ótsyese nɛ.”

25 Yesu éti ləwóno nəmə kusu nya ókpe ni kofi nkə, “Dika, nya lə abó lə osani əmə əsuə.” 26 Ləwóno nəmfó étinkəsə osani əmə keklekle nya díte ófa bəmbəəmbə fə ləbo lə wə əsuə.

²⁷ Itə iyifo mba kenke dínyə mfó yanii, nya báto mə əsuə bənkə, “Nte asatete fəfo nnya eto okle nə? Utidi əmfo kpe əsuəale woafə etiki budi ku awɔnɔ bua nya beetsyue wə etiki ato.” ²⁸ Itə esoo, Yesu eto diye áyɛ letsyo lə Galilea eto kaso kenke.

Yesu Átsya Betidi Kpə Bufi.

²⁹ Yesu ku wə bakasebi ku Yakobo ku Yohanes édu lə katsyako kamə nya bésu Simon ku Andreas eto diyo. ³⁰ Se bésu bédufə mfóo, betidi bətsyuə átɛyi Yesu bənkə, Simon eto usiəambe áyila, atikesi əmuə wə olabe. ³¹ Nyaso Yesu ésu wə ɔflo, nya ókɔbe wə lə kɔni ótakasə únyənsə. Lamfolamfo wə bufi bomə áyɛ wə nya ótaka útə mə lesa bédi.

³² Se ditsyitsyo lefe léyoo, betidi ákpa befimfi kenke ku mba awɔnɔ bua díkakpe bulə kpə báboko Yesu bə lə otsya mə bufi. ³³ Nya umə əmə kenke eto betidi díbə bənyə lə kesie mfó bánlɛ bobɛ. ³⁴ Yesu átsya betidi kpə ba nɛ bufi ateate bufi nya óla awɔnɔ bua lə betidi kpə əsuə ku mba awɔnɔ bua nsi lə əsuə, itsyise Yesu yi nkə awɔnɔ bua nyamə yi futsyə uni, nyaso wántɔnɔ nkə awɔnɔ nyamə tɛyi kulesa itsyi lə wə əsuə.

Yesu Ábe Ditiki Sɛɛ Nənə Letsya Lə Galilea Eto Kasə.

³⁵ Kolensiənto fɛ kale luusiə, Yesu átaka óbo lə diyo nəmə. Úsu kaka kutsyuə saa ləmbə nya óto ola útə Onanto.

³⁶ Kamaa, Simon ku wə bayetsyuə ésu bábɛbɛ Yesu. ³⁷ Lə lefe nə bənyə wə, bátɛyi wə bənkə, “Útsyue saa əbə ɔlɛ fə bobɛbɛ.”

³⁸ Fεε Yesu áteyi mə nkə, “Bitə læ busu umə bamba. Efe bæ ndi Anantotiki læ mfó tsya, itsyise nyamfo ni mə keyifo ka mimbə keyifokə læ kawunsiaə nε.”

³⁹ Nyaso óye ótsyilama Galilea eto kasə kenke, nya úkedi Anantotiki nyamə læ Yudafə eto ntsyakə kpə nya óla awənoə bua óbəsə læ betidi əsuə tsya.

Yesu Átsya Osani Utsyuə Wə Nle Bufisia Bufi.

⁴⁰ Osani utsyuə wə nle bufisia bufi əbə Yesu əflo. Óse akonki óle wə lekprakpa nkə læ əwunsəko wə. Jteyi wə nkə, “Lə alaa, ebofo mə botsya nya yuuyuə mə tsya.”

⁴¹ Wə etiki nyamə ənə Yesu kafo, nyaso únə wə kəni nya útidi wə. Nya óteyi wə nkə, “Nla nko. Fə əsuə kenke læ yele.” ⁴² Lamfolamfo bufi bomə əyuə wə.

⁴³ Mfó nya Yesu ləteyi wə nkə udu, nya ókpe wə kəfi keklekə nkə, ⁴⁴ “Mənnýə læ kusu ateyi betidi nnya dibə, bomu su læ efi fə əsuə esu ate Onanto eto Usumunyə. Lə efi nkpatə bo Mose eto kəfi ləto esuko. Nyamfo luuləkə ete bənkə bufi bomə əyuə fə nε.”

⁴⁵ Tsya lefe nə nwə əmə dídu əntə, útsyiko bofa katēyi kase Yesu létsya wə. Lə nnya esoo, Yesu ménsifo umə saa busu, itsyise betidi kpə læ wə əflo bubə. Nyamfo esoo, Yesu kosate átsyimε læ uməmflo kaka kuutsyə læmbə. Nya betidi dítsyi nlebe nlebe kpə, bəbə wə əflo mfó.

2

Yesu Átsya Abafa Wə Léba Onkpoo Kasə.

¹ Lə eyi ətsyuə eto kamaa, úsinkli úsu Kaper-naum nya læ wə businki kəbə əsuəə, betidi áno bæ úsinkli úbə oto. ² Nya betidi kpə díbə diyó nə ɔkɛ, ku ni kayoma kenke. Nya ɔkɛ mfó úkedi mə etiki. ³ Mfó nya betidi ena léboko ufimfi wə léba onkpo kasɔ wə ɔflo. ⁴ Nya se banlɛ kusu bunyə læ bayenko wə læ kesie bedufánko wə diyó kafo læ kase betidi mfui esoo, bésu bábe letsya bələkə ofo nya báyenko ufimfi əmə ku wə belabekə báyifəsə bətsyə le Yesu eto akɔ. ⁵ Se Yesu dínyə kase sɔ̃ɔ báfo bánɔ bæ wofo ufimfi əmə bətsya esoo, Yesu átɛyi nwə léba onkpo kasɔ əmə nkə, “Ubi, mfi fə abua ntsyɛ fə.”

⁶ Fɛɛ afi eto bateasa ba lɛkɛ mə lenti mfó ebu læ mə akɔəsi əsuə bátɛyi bənkə, ⁷ “Beso woatɛyi nko? ɔlɛ mbusiotiki budi. Onanto hã laafo abua bufi katsyɛ!”

⁸ Yesu áte mə nsusu nyaso ótɛyi mə nkə, “Beso ele bæ nyamfo læ mi? ⁹ Nte nya diyuə enso bətɛyi, ‘Mfi fə abua ntsyɛ fə,’ lee ‘Taka læ efi fə belabekə læ ayɛ edu’? ¹⁰ Nyaso læ itə bæ befo bɛnɔ biə Utidi Eto Ubii, nkpe əsuəale bæ mfi betidi eto abua ntsyɛ le kawunsiə kamfo. Bɛnɔ?” Mfó əməə, Yesu esi útsyi wə ənəmi útə ufimfi əmə nya ótɛyi wə nkə, ¹¹ “Taka læ efi fə belabekə læ esu diyó.”

¹² Nya osani əmfɔ létaka lamfolamfo úfi wə okla nya údu læ betidi bamə nýə mfó nti. Nyamfo éyifo betidi ba kenke nyə mfó yanii. Nya itə bəfi atəsə banlɛ Onanto butə. Məmbɛlɛ átɛyi bæ bənnýə tɔ nyamfo eto okle bənyə.

Yesu Ákpadi Lewi Nkə Utəkənkɔ Wə.

¹³ Nya Yesu disu údu úsu Galilea eto Ditumbukple kenye nya betidi bamə kenke díbə wə ɔflo mfó, nya óte mə Anantotiki. ¹⁴ Kase ónle bəye kafe lə ditumbukple nəmə ɔflo mfó, úsu únyə Lewi wə ni Alfeo eto ubi wə nsi lə kaka woafu umənkə. Nya Yesu leteyi wə nkə, “Taka lə ətəkəkə mə!” Nyaso Lewi átaka kpla nya útəkəkə wə.

¹⁵ Ketsyitsyokómii, Yesu ku wə bakasebi ku betidi kpə ba ntəkəkə wə, ésu Lewi eto bə lə besu bedi lesa ku wə. Mba dítkəkə wə eto bətsyuə éyifo mba laafu umənkə ku babuayifo.

¹⁶ Nya afi eto bateasa ba ni Yudafo eto lekpa nə baakpo Farisifo tsya aké mfó. Nyaso lefe nə afi eto bateasa ba ni Farisifo bamə dínyə bə Yesu si óle lesa budi ku babuayifo, bátə wə bakasebi bənkə, “Ntsyəso wonko mba laafu umənkə ku babuayifo nsi banle lesa budi?”

¹⁷ Se Yesu lenə etiki nnya bánle budii, óteyi mə nkə, “Betidi ba nkpe əsuəale manhiã ofanyə enso mba ni befimfi hã. Məmbə miə məəbə nləkə betidi sɛɛ, bomu babuayifo eso mimbə.”

Yesu Áte Asa Itsyi Lə Asatete Koko Ku Afɔfo Isua.

¹⁸ Lə lefe ditsyuə se Yohanes ku wə bakasebi ku Farisifo ləkə lə kenyekekə əsuəə, betidi bətsyuə əbə Yesu ɔflo nya bátə wə bənkə, “Beso fə fə bakasebi laankle kenye fe kase Yohanes eto bakasebi ku Farisifo laakle?”

¹⁹ Yesu ətə mə mbuayə lə lekpa seka óteyi nkə, “Nyale Okafəsə eto bakloboo, bani lesa budi lə kusie kakpakə kamə? Lee, yanle bə bənyə disuəyuə ku okafəsə əmə nkpe mə lentii?”

²⁰ Yuubə diyi ditsyuə bə lə bələkə okafəsə əmə lə mə nti, baklobo bamə ebokle kənyə beyifo yoyoyo. ²¹ Kuutsyuə saa emfi lefianku fəfə kaka kama lə kafia koko ka nle bola əsuə, lefianku fəfə nəmə ebunə kafia koko kamə kala lə bəflə kə, nya luutə dibiə koko nəmə sənsə ləmə lesə kə. ²² Nnya kamaa, bankpo ntə fəfə lə kubukikuətobe koko wə bəkakpo ntə bənyə kafo. Ntə fəfə bomə ebəkpo bobə kato itə bə kubukikuətobe koko əmə ebola itə bə ntə ku kubukikuətobe əmə ebuyifo asəsə. Bomu ntə fəfə, ubukikuətobe fəfə əsuə baakpo mu.”

Yesu Ni Ɔnwɛditsyayi Eto Onamute.

²³ Lefe ləni lə Ɔnwɛditsyayii, se Yesu ku wə bakasebi nyə lə anta eto ɔkuɛ utsyuə banlɛ bofee, bəfəsə anta ətsyuə balɛ bəyimi. ²⁴ Nyaso Farisifo bətsyuə átə Yesu bənkə, “Beso fə bakasebi ləyifo nko? Bo kəfi məntə kusu bə beyifo nko lə Ɔnwɛditsyayi.”

²⁵⁻²⁶ Lə nnya əsuə Yesu átə mə nkə, “Biankla lə Onanto eto Kukuə Kənkə eto Awənisa lesa nə Oka David díyifo? Lə lefe nə kukpənsɛ lɛlɛ wə ku wə bayetsyuə, Oka David ésu kaka bəətə Onanto kedi lə Usumunyə Ninə Kənkə wə baakpo Abiatar eto lefe. Úləkə didisa kənkə nə ntə mfó itə mba ləətə wə kedi hā lə Disumuyo údi nya útə wə bayetsyuə tsya ditsyuə bédi. Moses eto kəfi məntə nkomə eto diyifobi nəmfo kusu, tsya bánteyi mə kulesa.”

²⁷ Nya Yesu ləteyi mə nkə, “Onanto ətsyə Ɔnwɛditsyayi itə utidi eto lələkəsə. Inni utidi bətsyə itə diyi nəmə eto lələkəsə. ²⁸ Nyaso

mɔ, Utidi Eto Ubii, mɔ ke ni ɔnwɛditsyɛyi eto Onamute.”

3

Yesu Átsya Nwə Eto Kɔni Díkpə Lə ɔnwɛditsyɛyi.

¹ Lə lefe bamba əsuəə, Yesu esi úsu Yudafɔ eto katsyakɔ. Utsyuə ake mfó wə eto kɔni díkpə konyoma.

² Betidi ba lɛkɛ mfó eto bətsyuə ńyə balɛ bobɛ lə wootsya utidi əmə lə ɔnwɛditsyɛyi nəmə əsuə lə babe lə buunyə etiki lə wə əsuə.

³ Yesu ákpadi utidi əmə eto kɔni díkpə útsyɛ lə betidi ba kenke eto ənəmi. ⁴ Nya útsyi wə ənəmi útə betidi bamə kenke nya ótɔ mə nkə, “Élɛkɛ bə utidi yifo kasɛɛ lə ɔnwɛditsyɛyi, lee ɔnwɛditsyɛyi eyifo diyi nə utidi loobiasə asa? Iyifo diyi nə bəətə nkpə, lee iyifo diyi nə baa biasə nkpə?” Fɛɛ bámfo wə kulesa bɔtɛyi. ⁵ Yesu étsyi ɔwuninsə nya óbɛ mə ku lɛblofi itsyisɛ ílɛ wə lə lɛkɔɛsi se bánla bə baawunsəko mə bətsyuə eso. Nya ótɛyi ufimfi əmə nkə, “Nə fə kɔni etsyue.” Únə ko útsyue. Nya ete kɔni komə létsya wə. ⁶ Lə nnya əsuəə, Farisifɔ bamə édu nya bésu bátsya ku Herod eto betidi nya bákpe disɪ lə kase bɔɔyɛ balɔ Yesu.

Yesu Átsya Betidi Kpə Lə Galilea Eto Ditumbukplɛ ɔflɔ.

⁷⁻⁸ Nya Yesu ku wə bakasebi lɛyɛ bésu Galilea eto ditumbukplɛ ɔflɔ. Nya sitiditu kplɛ sia ditsyi Galilea ku Yudea ku Yerusalem ku Idumia eto kasɔ ku mba ditsyi Yordan eto ketu eto lekpake

nə nse ku mba ditsyi Tiro ku Sidon tsya ətəko wə bəbə. Nnya ni bənkə wə ayanisa nnya ɔnlə buyifo əbɔye etsyo nyaso betidi kpə əla bə befi mə ənəmi bənyə wə.

⁹⁻¹⁰ Lə lefe nəmfó se Yesu díkatsya betidi kpə esoo, befimfi kpə lə bokplatsya bə lə betidi wə ko lə bəmuə ale. Nyaso Yesu átəyi wə bakasebi nkə babəbe ɔklo bənyənsə lə utuflo, itə bə lə betidi bamə əbə befuii, wofo bobə kədufə lə wə kafo.

¹¹ Ləwɔnɔ bua əsiə lə betidi bətsyuə ba díbə mfó əsuə. Lə bənyə, bənyə Yesu koo, békedu kanɔ nya bákafa katəyi bənkə, “Fə ni Onanto eto Ubi.” ¹² Nya Yesu káninko mə nkə bəntə lə betidi lə bate futsyə uni.

Yesu Ələkə Lefosi Batɔnkpe Inuə Itə Wə Əsuə.

¹³ Nyamfo eto kamaa, Yesu ábe úsu kətini disi. Nya mfóo, ókpadi mba óla nkə bakə ko wə.

¹⁴ Betidi bamfo əbə wə ɔflo nya úləkə lefosi inuə lə mə nti. Nya útəkə mə diye nkə batɔnkpe. Ɔtəyi mə nkə, “Nləkə mi minkə bəkə mə lə ɔflo lefe saa. Mootsyese mi lə bisu bidi Anantotiki. ¹⁵ Nya biəkə əsuəale bela awɔnɔ bua bitsyiko lə betidi əsuə.”

¹⁶⁻¹⁹ Betidi lefosi inuə ba úləkə eto aye ni Simon wə Yesu dítə diye nkə Petro ku Yakobo ku wə ɔyimisani kəkə Yohanes ba ni Sebedeo eto bebi ba Yesu dítəkə diye nkə Boanerges eto kasɔ ni nkə, beedi etiki ku utə fe kase kato laafa kekumi bembembe, bafəfə ni Andreas ku Filipo ku Bartolomeo ku Mateo ku Toma ku Yakobo wə ni Alfeo eto ubi ku Tadeo ku Simon wə lə lefe ditsyuə nə lefe létə mə kasɔ disi ku Yuda Iskariot, nwə luubə uləkə Yesu utə.

Afi Eto Bateasa Áka Yesu.

²⁰ Se Yesu dídu mfóo, údu úsu diyo ditsyuə. Nya betidi kpə esi bəbə mə oflo mfó. Itə bə ibə ekε ale itə Yesu ku wə bakasebi bə bánkε lefe kulaa tsya lə bedi lesa. ²¹ Se wə kosate eto betidi leno nkoo, bésu bə lə besu bənə wə besuko diyo, itsyise bátɛyi bənkə, “Disi abia wə.” ²² Nya afi eto bateasa ba ditsyi Yerusalem letɛyi bənkə, “Ləwɔno bua əbə disí lə Yesu əsuə. Nya awɔno bua eto ɔtonkotonkoo, ni nwə dítə wə əsuəale fε ɔnlε awɔno bua nyamfó bola kabonko lə betidi əsuə.”

²³ Nyaso Yesu ákpadi betidi bamə nya údi etiki ko mə lə lekpa əsuə nkə, “Ntsyə yuubə bə Obonsam ebofo wə əsuə bola ketsyiko lə utidi əsuə? ²⁴ Lə ibə bənkə sekakediko áma se əsuə lə akpaa, nya akpa akpa nyamə nlε bəkpɔ lə mə əsuə ntii, nkomə eto sekakediko siamə əmbofo buńyə. ²⁵ Lə diyo ditsyuə eto betidi əsənsə lə mə bətsyuə əsuəə, anto ku anto nlε bəkpɔ lə mə bətsyuə əsuəə, diyo nəmfó əmbofo buńyə. ²⁶ Nyaso lə Obonsam ataka uńyə ɔnlε bəkpɔ ku wə əsuə ku wə sekakediko sia lema akpa akpaa, sekakediko siamfó ebusənsə nya wə sekakedidi ebolo.

²⁷ “Iyifo etiki eto ɔnukuale bə utidi əmbofo botaka kesu ketu əsuəaletidi lə wə diyo, ketsyi wə bikə. Fε wofo budufə lə wə diyo nəməə, tsyise umuə əsuəaletidi əmə okle.

²⁸ “Nlε mi bətɛyi sitinti minkə Onanto ebufi lehua saa nə betidi díyifo ku diye bua saa nə baakpadi Onanto ɔtsyε. ²⁹ Fεε diye bua saa nə utidi lookpadi Onanto eto Ləwɔno Kεnkεε,

Onanto əmbufi ni ɔtsyɛ wə kulefe. Itsyise wuufi lehua nəmfo fenkə lehua nə wembotasua.”

³⁰ Yesu áteyi nyamfo nko itsyise betidi bənkə ləwɔnɔ bua kpe lə wə əsuə.

Bawoe Ni Yesu Eto Batokpenyə Tinti?

³¹ Lə lefe nəmə əsuə, Yesu eto bayimisani ku wə ambe əbə mfó. Bənyə lə lekple nya bákpe wə utidi bə bahiã wə. ³² Nyaso betidi ba létsyilama wə áteyi Yesu bənkə, “Be, fə ambe ku fə bayimisani nyə lə lekple bə bə.”

³³ Nyaso Yesu áto mə nkə, “Owoe ni mə ambe? Bawoe ni mə bayimisani?”

³⁴ Nya ótsyilamasə ənəmi nya óbe betidi ba nsi letsyilama wə mfó nya óteyi nkə, “Bee, nyə mbamfo ni mə ambe nye mə bayimisani.

³⁵ Utsyuə saa wə leeyifo Onanto eto lelabii, wə ni mə ɔyimisani nye mə ɔyimisio, nye mə ambe nɛ.”

4

Yesu Áteyi Lekpa Itsyi Lə Eyibisense Ɔsuə.

¹ Yesu esi ésu Galilea eto ditumbukple flo nya ɔnlɛ Ditiki Sɛɛ nə mə bote. Nya lə kase betidi ba létsyilama wə mfui esoo, údufə lə ɔklo kafo lə ntu bomə əsuə, nya úsiə kasɔ. Nya betidi bamə dínyə lə ntu kɛnyɛ fɛ Yesu dídi ko mə etiki. ² Lefe kpə lə wə asatete əsuə, údi etiki ɔyenko lə akpa əsuə lə ufi uləkə asa nnya óla nkə loote mə kasɔ. Asa nnya óte mə ni nkə.

³ “Bɛnɔ! Lefe lɔnii, ɔkuɛmfɔ ɔni ésu ɔkue nkə lə usu usiə eyibibi ətsyuə. ⁴ Lə lefe nə ɔnlɛ eyibibi nyamə busə, íbə bə ətsyuə álo ékpo lə

usunte oflo, nya baklobe díbæ báse nnya bámini.
⁵ Etsyuæ álo ékpo læ aba æsuæ, kaka sitæ lemfui.
 Nyaso eyibibi nyamfo ækæ mlæ. ⁶ Fæe se kofe
 lébe kenyeæ, éblobe nya íkpa. Nnya ni bæ, nnya
 keyudu mænnyæ didisa itsyi læ aba nyamæ eso.
⁷ Eyibibi nyamæ eto ætsyuæ ésu ékpo læ biyu nti.
 Nya kanyi kamæ léto kėti nnya. Nyaso yámfo
 bônwo. ⁸ Nya íbæ bæ ætsyuæ álo ékpo læ kaso
 sæ æsuæ. Nya íkæ, nya yébe kukonɔ nya yenwo
 ebibi. Nya ætsyuæ lenwo ebibi fosi ætsyæ, ebibi
 fosi akua, ætsyuæ lenwo kolofa.”

⁹ Læ kalosækoo, Yesu átæyi mæ nkæ, “Nyaso fæ
 ke nkpe atoo, tsyuæ ato kukunɔ læ anɔ.”

*Yesu Elækæ Lekpa Næmæ Kaso Óte Mba Ntækæko
 Wæ.*

¹⁰ Læ lefe næ Yesu mate insii, wæ bakasebi lefosi
 inuæ bamæ ku mba lætækæko wæ æbæ wæ oflo
 nya báto wæ bæ ulækæ lekpa næmæ kaso ote mæ.

¹¹ Nya Yesu lætæyi mæ nkæ, “Mimii, béfi Onanto
 sekakediko eto akulasa bætæ mi. Fæe mba díbuu,
 nye bafefæ ba lentækæko mæ, æbɔnɔ mɔ asatete
 nyamæ eyæ læ akpa æsuæ hã. ¹² Nyaso íbæ itæ fe
 kase Onanto eto unyelækætidi læwɔni útsyæ nkæ,
 ‘Buukabe tsyaa, bææmbunyæ bætsyæ lekpo.

Buukætsyue ato tsyaa, bææmbɔnɔ kaso.
 Nnya ni bæ læ banɔ nye bænyæ tsyaa, bææmbɔnɔ
 kaso.

læ betsyi mæ ænæmi bætæ Onanto,
 bæ læ ufi mæ abua ɔtsyæ mæ.’ ”

¹³ Nya Yesu læto mæ nkæ, “Bianno lekpa næmfo
 eto kaso? Ntsyæ fæ biofo lekpa bamba saa kaso
 bɔnɔ? ¹⁴ Ōkuemfo æmæ læ Onanto eto etiki
 busænsæ. ¹⁵ Betidi bætsyuæ ale kase eyibibi

ətsyuə luubə ekpo lə kusu oflo. Lə kase banle bɔnɔɔ, ete Obonsam əbɛ nya wəənwə nnya kələkə lə mə nsusu əsuə. ¹⁶ Betidi bamba tsya ale eyibibi nnya ləəbə kakpo lə aba əsuə. Lə lefe nə banle nnya bɔnɔɔ, yeakpe mə disuəyuə. ¹⁷ Tsya ditiki nəmə eto keyudu ənnyə kasɔ kukɔnɔ. Baafo kanɔ itə lefe kliminti ete. Nya lefe nə ke kənə nye bulə sɛkɛ dɪbə lə mə əsuə lə ditiki nəmə esoo, beesinkli kama.

¹⁸ “Nya betidi bətsyuə tsya te fe eyibibi nnya dɪbə ikə lə kanyi nti. Nya mbamfó ni betidi ba laanɔ ditiki nəmə. ¹⁹ Fɛɛ kawunsiə kamfo eto bulə ku atabi bɔbɛbɛ kekkeke ku əsuə eto lələkəsə ku kawunsiə eto kamini bɔbɛbɛ aafɔ mə ketu. Nyamfo laakle kemli ditiki nəmə itə bə diamfo ebibi bɔnwɔ.

²⁰ “Nya betidi bətsyuə te fe eyibibi nnya lélo ékpo lə kasɔ sɛɛ əsuə. Baafo etiki nyamə ku utu faa, nya baanwɔ ebibi kpə. Ətsyuə aanwɔ ebibi fosi ətsyə, nye awosi akua nye kolofa.”

Okandie Eto Keyifo Ndi Bə Utə Diyənde.

²¹ Yesu esi ɔtɔ mə nkə, “Utidi aato okandie kefi kakpe lə ditsyitsya kalɔ nye lə mpa kalɔ? Inni okandie eto kətəkəkɔ baato okandie kətəkə?”

²² Lesa nə ke nkpe lə kakula əsuə, əbɔbɔ lə lekple utidi saa nyə. Lesa nə ke nkpe lə kakula əsuə əbɔbɔ tɛnkɛ utsyuə saa nyə. ²³ Nyaso lə bekke atoo, bɛnɔ kukɔnɔ!”

²⁴ Yesu esi ɔtɛyi nkə, “Bifi mi ato bekke kukɔnɔ lə lesa nə bɛnlɛ bɔnɔ əsuə. Kase faakla asa yeeyi kaba kakpo kətə utidii, nko ke eto okle Onanto lookla utə fintsyə nɛ! ²⁵ Utidi wə ke asa ntee, buusi bətə wə bawunsə. Nya utidi wə kulesa

lente, nnya nte wə tsyaa, boole nnya bafo wə lə ani.”

Yesu Átɛyi Lekpa Itsyi Lə Eyibibi Boto Ɛsuə.

²⁶ Yesu esi ótɛyi mə nkə, “Onanto eto sekakedikɔ ale osani wə laato eyibibi. ²⁷ Diyi saa woalabe kataka, nya nkomə eto eyibibi nyamə nɛ bukə kabe. Fɛɛ unnyi kase asa nɛ butsyə nkomə. ²⁸ Nnya ni bənkə kasɔ ka báto diyibibi nəməə, ke laalɛ ni ola nko. Tute, lə díkəə, díabɔ afanto, nya uyi laabɔ. Nya lə ébee, yeawɔ ebibi kpə. ²⁹ Lə ebibi nyamə ábe ɛsɛɛ, ɔkuɛmfo əmə əbə kala nnya. Itsyise nnya lələfe eboyo.”

Lekpa Itsyi Lə Diyibibi Kɛkɛ Ɛsuə.

³⁰ Yesu átɔ nkə, “Be muufi nkatesə ku Onanto eto sekakedikɔ. Nte lekpa nə ele bə mfi nləkə nyamfo eto kasɔ? ³¹ Ite fenkə utidi éfi diyibibi nə nso bɔfɛ lə kawunsiə úsu óto. ³² Lefe ditsyuə eto kamaa, diəkə kafiani kuyi. Nya nkomə eto kuyi komfo laamɔ kasɔ ɔkuɛ eto ediyi fɛfɛ kenke. Koata kalɛ kpə. Nya baklɔbɛ laato ayo lə kuyi komə eto kalɛ əsuə.”

³³ Yesu édi mə etiki nyamfo lə kase utsyuə sa lofo kasɔ bɔnɔ. ³⁴ Etiki saa wuudi məə, woatɛyi nnya kayɛ lə akpa əsuə. Lə lefe nə itə kusu bə wonko wə bakasebi bamə hã sii, nya fɛ wəələkə nnya kasɔ kate mə nɛ.

Yesu Éti Ufiebɛ Eto Ɛsuale Kusu.

³⁵ Diyi nəmfó eto ditsyitsyo lefee, Yesu átɛyi wə bakasebi nkə, “Bitə lə bɔyila ditumbukplɛ nəmfo busu ni lekpake nə nse.” ³⁶ Nyaso bédu lə betidi əto ditsyukpa nəmfo ɔflɔ bésu bedufə

bəsiə lə ɔklo wə Yesu dísiə əsuə, nya bétsyiko ditumbukplɛ nəmə boyila. Kaklo bamba tsya ənyə mfó. ³⁷ Yanklɛ fɛ ufiebi ko dítsyiko bɔsɔ bembembe nya ɔsɔ ntu ókpo lə ɔklo əmə kafo, nya ibu sɛkɛ lə ntu lə buyi ɔklo əmə lə onya udu fə lə ntu kasɔ. ³⁸ Lə lefe nəmfóo, Yesu əsiə lə ɔklo əmə eto kama, úfi wə disí útəkə lə esunde əsuə nya ɔnlɛ selabe. Nyaso básanklisə wə nya bátɛyi wə bənkə, “Oteasa, ɛnlɛ fə bulə bənkə boəbə bukpə?”

³⁹ Yesu átaka únyə nya ófa ɔtɛyi nkə, “Ufiebi, yɛ bɔsɔ!” Nya ɔtɛyi ntu bomə tsya nkə, “Ntu yɛ bonwa!” Nya ufiebi əmə disinkli ɔyɛ bɔsɔ, nya ntu bomə eto ənəmi disinkli búyuə buɛɛ kananaa.

⁴⁰ Nya Yesu lɛtɔ wə bakasebi nkə, “Beso biate sikpi mmə? Bíamfo tɔ bɛnɔ?”

⁴¹ Sikpi əmuə mə sefensə, nya bétsyiko mə bətsyuə bɔtɔ bənkə, “Owoe ko ni utidi əmfɔ? Bə ntu bomə ku ufiebi kenke etsyue wə etiki koto!”

5

Yesu Ála Awɔnɔ Bua Lə Osani Utsyuə Ísuə.

¹ Nyamfo eto kamaa, Yesu ku wə bakasebi édu bésu Galilea eto Ditumbukplɛ eto situma sia nse lə Gerasefɔ eto kasɔ. ² Le kase Yesu lɛbɔ le ɔklo əmə kafo koo, osani utsyuə wə lɛwɔnɔ bua nsi lə əsuəə, əbə ɔtsyako wə. Osani əmfɔ ábɔ lə edi nnya lɛfi mfó nti. ³ Itsyise mfó úkəsiə nɛ. Lə lefe nə lefe mməə, betidi ba kenke māmfo wə bumuə kakpɛ lə amana. ⁴ Lə lefe kpə əsuəə, bákafɔ wə ani ku akpa bokle. Fɛɛ wókala nnya bufəsə kabɔ. Utidi əmfɔ akɛ əsuəale tinti, itə bə kutsyuə

saa mánkamfo wə bumuə kətsyə. ⁵ Kətsyə ku kakómi kenke úkatsyilama læ betidi eto edi ku atini nyamə nti, nya úkakpo kudu, ékefi abambi katsya wə əsuə.

⁶ Utidi əmfo ənyə kəsese fə únyə Yesu. Nyaso útsyetsyi úsu óse akonki læ Yesu eto ənəmi. ⁷ Nya ófa bembembe óteyi nkə, “Onanto Fanlonlo eto Ubi! Be nkpe læ mɔ ku fə lenti mfo? Nlɛ fə lekpa, se mɛ uyi læ Onanto eto diye əsuə fənkə embunə mɛ koto!” ⁸ Óteyi nkomə, itsyise óno bæ Yesu Yesu áto okue nkə, “Ləwɔno bua bo læ osani əmfo əsuə.”

⁹ Nya Yesu leto wə nkə, “Ntsyə baakpo fə?”

Nya útə mbuayɛ nkə, “Mɔ baakpo omantsya itsyise bomba nkpe læ nwə mfo əsuə, bufui.” ¹⁰ Nya ólɛ Yesu lekpa nkə woanla mə læ kaso kamə.

¹¹ Lə lefe nəmfó əsuə, bakplako kpə ənyə lɛ kɔtini komə oflo balɛ budi. ¹² Nya awɔno nyamfo lelɛ Yesu lekpa bənkə, “La bo akpe læ bakplako ba nyə læ mmə, læ budu budufə læ mə əsuə.”

¹³ Nya ótono útə mə, nya awɔno nyamə ləbo læ osani əmfo əsuə nya bədu bəsu bədufə læ bakplako bamə əsuə. Nya bakplako bamə kenke, ba eto utu luuyifo fe akpi ənuə, ditsyetsyi bəsu báwunini læ kɔtini komə eto kotosi bəsu bədufə læ ditumbukplɛ nəmə nya bánya bátylo kenke.

¹⁴ Nya mba nlɛ bakplako bamə bobee, ditsyetsyi bəsu umə əmə ku mba lɛkɛ læ wə oflo mfó, nya bəsu batɛyi betidi ba kenke lesa nə díbə. Mba bátɛyi ésu mfó, bəsu bábe lesa nə díbə. ¹⁵ Nya lefe nə bəbə Yesu oflo, bənyə utidi

wə awɔnɔ bua kpə dísiə lə əsuə mfó. Nya únsi lə kasɔ, ónkpe awu, íkakra ko wə. Nya sikpi dímuə məmble kenke. ¹⁶ Betidi ba leka wə búnyəə, áteyi lesa saa nə díbə lə utidi əmə ku bakplako bamə əsuə. ¹⁷ Nyaso bále Yesu lekpakra bə udu lə mə kasɔ.

¹⁸ Lefe nə Yesu nle budufə lə ɔklo əmə əsuəə, osani əmə əsuə awɔnɔ bua dísiəə, ale wə lekpakra nkə, “Tɔnɔ lə ntəkəko fə lə bukaye katsyilama.”

¹⁹ Fɛɛ Yesu mántɔnɔ. Bomu óteyi wə nkə, “Sinkli esu fə betidi ɔflo lə ateyi mə kase Onamute əmə lewunsə ko fə ku kase únyə fə kaminsə.”

²⁰ Nyaso osani əmfo édu úsu ótsyilama Kəmə Lefosi kamə nya óteyi betidi bamə lesa saa nə Yesu díyifo útə wə. Nya íyifo mba lenɔ nnya yanii.

Yesu Átsya Yairo Wə Ndi Yudafɔ Eto Katsyako Eto Uninə Eto Ubisiobi Nya Ótsya Usio Fimfi Utsyuə Tsya.

²¹ Yesu əsiə lə ɔklo úsinkli úsu ditumbukplə nəmə eto Yudafɔ eto lekpake nə nse. Se úsu údufə ditumbukplə nəmə eto kənyə mfóo, betidi kpə əbə bátsyilama wə. ²² Nya Yudafɔ eto katsyako eto uninə ɔni utsyuə wə baakpo Yairo əbə mfó. Se únyə Yesuu, óse akonki lə wə ako.

²³ Nya óle wə lekpakra kekkele nkə, “Mɔ ubisiobi kekke le bufi kekkele. Nyaso bə lə əbə efi fə kɔni ətəkə lə wə bə lə əsuə lə imuə wə ale lə ɔkə nkpe.” ²⁴ Nyaso Yesu átaka útəkəko wə.

Nya lə kase betidi ba díkəko Yesu difui esoo, bátsyilama wə se bántɔ. ²⁵ Nya usio utsyuə ake

lè mæ nti, wè kɔtɔ díkákpo lè lefosi alé ənuə sɔ̃ɔ əsuə. ²⁶ Ɔkɛ lè kanyi əsuə lè lefe nə eto lefe mba leeyifo afa díkətə wə afa kulaatsya. Wóbiasə wə atabi kenke ótsya bufi bomfo, tsya bufi bomə mányuə wə. Kato bomu bóbe. ²⁷ Ɔnɔ etiki itsyi lè Yesu əsuə, nyaso útəkəko betidi ba dítəkəko Yesu kama. ²⁸ Ɔtɛyi wə əsuə nkə, “Lè mfó wə awu butidi koo, eni bufi bomə əbɔyɛ mɛ.” ²⁹ Nyaso lefe nə útidi Yesu eto awuu, kɔtɔ komə díkákpo wəə, ála kplo lamfolamfo! Nya únyə utsyə lekpo lè wə əsuə nkə wə bufi bomə áyɛ wə, nyaso kanyi ka ɔnlɛ bunyəə, álo.

³⁰ Lamfolamfo Yesu áte nkə əsuəale ətsyuə ábɔ wə lə wə əsuə. Nyaso úkənə únyə, nya ótsyi ɔwuninsə, nya ótɔ betidi bamə ntəkəko wə nkə, “Owoe ni futsyə dítididi mɛ awu?”

³¹ Wə bakasebi bamə átɔ wə bənkə, “Be kase betidi bamfo letsyilama fə. Beso faatɔ fə, owoe ni futsyə dítididi fə?”

³² Tsyaa, Yesu esi úkənə únyə ɔlɛ ənəmi bot-syilamasə kabe lə woofɔ futsyə dítididi wə bunyə.

³³ Usio əmə mfó ənyə utsyə lekpo nkə lesatsyuə əbə wə lə əsuə. Nyaso lə sikpitete ku ketinkə əsuəə, óbɔ úbə ósɛ akonki lə Yesu eto akɔ. Nya ótɛyi wə lə ɔnukualɛ əsuə, lesa nə díbə. ³⁴ Yesu átɛyi wə nkə, “Mɔ ubisiobi, fə bofokanɔ átsya fə. Su lə diyuə əsuə. Fə kanyi ensiambu sinkli kəbə bio.”

³⁵ Lè lefe nə Yesu nlɛ nyamfo bɔtɛyii, batɔnkpe bətsyuə étsyi Yudafɔ eto katsyako kamə eto uninə əmə eto diyo bəbə nya bátɛyi wə bənkə, “Fə ubi əmə ébukpə koko. Beso fensi fanlɛ Oteasa əmfɔ bulə?”

³⁶ Yesu méntsyue ditiki nə mba nle bɔtɛyi mfó ato. Bomu ótɛyi Yairo nkə, “Mante sikpi, fo anɔ ete.”

³⁷ Nya Yesu lékpa Petro ku Yakobo ku wə ɔyimisani Yohanes mate hã, nya bésu Yairo eto diyo. ³⁸ Nya lefe nə bédufə diyo nəmə, nya Yesu dínyə kase banle kanyi bunyə kakpo edu kewi nkuu, ³⁹ údufə lə mənti nya ótɔ mə nkə, “Be léboko kudu komfo bokpo? Beso bənle nku? Dikpefi nəmfó ménkrə. Selabe ete onlabe.” ⁴⁰ Se ótɛyi nkoo, betidi ba ńyə mfó étsyiko wə bumə.

Nyaso Yesu ətə nkə məmble bɔ besu lekple, nya útə ubi əmə eto anto ku ambe ku wə bakasebi itsyə bamə nkə bedufə kaka ubi əmə díkpe ónlabe lə kasɔ. ⁴¹ Yesu ákɔbe usiobi kəkə əmə lə kɔni nya ótɛyi wə nkə, “Talita Koumu.” Nya kasɔ lə sele siamə ni nkə, “Disiobi, nle fə bɔtɛyi minkə, taka əńyə!” ⁴² Lamfolamfo, disiobi nəmə nə dikafɔ lefosi alɛ ənuəə, átaka úńyə nya útsyiko bɔyɛ katsyilama. Se íbə nkoo, íyifo məmble yanii. ⁴³ Nyaso Yesu əkə mə ato keklege nkə bantɛyi kuutsyuə saa. Nya kamaa, ótɛyi mə nkə, “Bitə wə lesatsyuə lə udi.”

6

Yesu Eto Umə Eto Betidi Áni Wə.

¹ Yesu édu mfó úsu wə umə kaka úsiə óbɛ, ku wə bakasebi. ² Nya lə Yudafɔ eto ɔnwéditsyayi əsuəə, úsu ɔlɛ Anantotiki búdi lə Yudafɔ eto katsyakɔ mfó. Nyaso íyifo betidi ba kenke lenɔ wə asatetee yanii.

Bátɔ bətsyuə bənkə, “Sieti ókase etiki nyamfo eto okle utsyiko? Nte kobe ko eto okle nkpe wə

bə woafɔ ayanisa nyamfo eto okle buyifo? ³ Inni wə ni Maria eto ubi wə ni nwə laawe keyi? Lee inni wə ni Yakobo ku Yose ku Yuda ku Simon eto ɔyimisani? Nya wə bayimisiɔ tsya nkpe mfo!” Nyaso betidi bamfo mámfo wə.

⁴ Yesu áteyi mə nkə, “Onanto eto unyələkətidi kpe dibu lə nlebe kpə. Fεε lə wə kosate eto umə, lə wə betidi ntii, ku lə wə kosate eto diyo eto betidi eto ənəmii, umbə dibu saa.” ⁵⁻⁶ Nnya ni bənkə wə kosate eto umə eto betidi mámfo wə banɔ, etiki nyamfo éyifo Yesu yanii tinti. Lə nyamfo eso wóamfo ayanisa kpə buyifo mfó enso nnya úfi wə ani útəkə befimfi bətsyuə lə əsuə nya mə bufi díyuə mə.

Yesu Ákpe Lefosi Bakasebi Inuə Bamə Kɔtɔ.

Lə nyamfo eto kamaa, Yesu átsyilama mbuto bo letsyilama mfó, kate Anantotiki nyamə. ⁷ Nya ókpadi wə bakasebi lefosi inuə bamə utsyə, nya óla mə ótsyese inuə inuə. Útə mə əsuəale nkə baso awɔnɔ bua ani. ⁸ Nya óteyi mə nkə, “Mi kuutsyuə saa manle kulesa usuko kusu komə, enso uyi wə baalε kɔni hā. Bientsyi didisa nye otobe fenkə mba laatɔ asa kafe. Bientsyi atabi lə mi katobe. ⁹ Bekpe mi afɔkpa, tsya bientsyi akpesa bamba saa enso nnya bənkpe.”

¹⁰ Usi óteyi mə nkə, “Kaka kee bafɔ mii, bεkε mfó isu ese lefe nə biuudu. ¹¹ Lə bídufə umə utsyuə nya betidi bamfó dímamfo mi nye báni bə beembutsyue mi ditiki kotoo, bidu lə befle mi nkpafo eto sitə bekpo mfó. Nyamfo loote Onanto eto kotonənə eto ditsyəbi nə ləbə bubə itə mə lə umə əmə.”

¹² Nyaso bakasebi bamə édu bésu bátsyilama bédi Anantotiki nyamə budi kafe bæ utsyuə saa sinkli læ abuayifoyifo kama. ¹³ Bála awɔnɔ bua kpə læ betidi əsuə. Nya bédiki befimfi kpə nnuəbi itə bəmuə ale.

Oka Herodes Etə Bála Yohanes Ntufləsətidi Eto Disi.

¹⁴ Lə lefe nəmfóo, Oka Herodes ákanɔ asa nnya kenke nɛ búbə bóno, itsyise Yesu eto diye áyɛ letsyo ésu kalebe saa. Betidi bətsyuə ákatɛyi bənkə, “Yohanes wə ni ntufɛsətidi ésinkli úbə nkpə! Nyaso onkpe əsuəale ɔnɛ ayanisa buyifo nɛ!”

¹⁵ Bətsyuə tsya ákatɛyi bənkə, “Wə ni Onanto eto Unyeləkətidi Elia.”

Betsyuə tsya bæ, “Wə ni Onanto eto Unyeləkətidi, itsyise útə fe Onanto eto bənyeləkətidi eto ɔni.”

¹⁶ Lefe nə Herodes lenɔ nyamfóo, wuntsya átɛyi nkə, “Yohanes wə útə bála disi uni disi ósankli utsyi ɔkɔmə úbə!”

¹⁷ Etɔnsə, Herodes kosate dítə kusu nkə bəmuə Yohanes, nya útə kusu nkə bakle wə, befi wə bakpe læ diyo. Herodes éyifo nyamfo itsyi læ Herodia wə úsu úfi, wə dídí wə ɔyimi Filipo eto usiə eso. ¹⁸ Yohanes ákatɛyi Herodes nkə, “Yanlɛkɛ bæ fo fə ɔyimisani eto usiə efi.”

¹⁹ Nyaso Yohanes eto etiki əkələ Herodia, nyaso úkəkisi wə. Nya óbɛbɛ kusu nkə læ olo wə.

²⁰ Tsyaa, wámfo kusu bunyə læ Herodes eso. Itsyise Herodes áte Yohanes sikpi se unyi nkə Yohanes éyifo ɔnukuaɛtidi ku utidi wə díyifo kɛnkɛ eso. Nyaso úkase wə. Lefe kpə, óla nkə læ

úkanɔ wə asatete, ite bæ wə etiki nyamə káto wə læ lekɔəsi læ óno nnya tsya fə.

²¹ Lə kalosəkɔɔ, íbə bæ Herodia ənyə kusu ko ɔnlɛ bɔbɛbɛ. Diyi nəmfó didi Herodes eto leleyi. Herodes ákpadi wə beninətidi læ wə sekakedikɔ ku wə bamamanyə eto beninə ku Galilea eto kasɔ eto beninə kplɛkplɛ læ wə lesakedikɔ. ²² Herodia eto kebitɛ əbə mfó úwi kewi ókpe disuəyuə nya Oka Herodes ku wə bahɔ læ lesakedikɔ mfó tinti.

Nyaso Oka Herodes átɔ kebitɛ kamə nkə, “Be faala fə læ ntə fə?” ²³ Nya usi ótɛyi wə tsya nkə, “Ekpe læ mɔ lekankpomɛ, minkə muutə fə lesa nə ke fɔɔtɔ mɛ, læ mɔ sekakedikɔ eto kutsyɔ kulaa tsya!”

²⁴ Nyaso usiobi əmfo átaka úsu ótɔ wə ambe nkə, “Be ele bæ ntɔ?”

Nya wə ambe letɛyi wə nkə, “Tɔ wə Yohanes Ntufɛsətidi eto disi.”

²⁵ Disiobi nəmfɔ ésinkli kpla dísu diyo nəmə kafo nya ótɛyi Herodes nkə, “Nla minkə la Yohanes Ntufɛsətidi eto disi ətəkə læ ɔkpe tɛnkɛ əsuə ətə mɛ mɔmɔmɔmɔ!”

²⁶ Nyamfo ába oka Herodes lekɔəsi, fɛɛ wənsiəmbɔfo ntamu bo óka utsyɛ læ beninətidi bamfó eto ənəmi butu. ²⁷ Lə nyaso ókpe wə oblafɔ lamfolamfo nkə usu ola Yohanes eto disi læ ufi oboko. Nya oblafɔ əmfó didu úsu Aba eto diyo nə baakpe betidi, mfó úsu óla Yohanes eto disi. ²⁸ Kamaa, úfi disi nəmə útəkə læ ɔkpe tɛnkɛ əsuə nya úfi ni oboko disiobi nəmə. Nya wuntsya dífi ni úsu útə wə ambe.

²⁹ Lefe nə Yohanes eto bakasebi læno ditiki nəmfɔo, bésu báfo wə ɔko bésu bɛbikə.

Yesu Ʒtə Betidi Akpi Anɔ Lesa Bédi.

³⁰ Batɔnkpe ba Yesu lékpɛ nkə besu batsyilama lekpake mfó, ésinkli bəbə bátɛyi wə nnya kenke bésu beyifo ku asa nnya báte. ³¹ Nya kaka mə ku Yesu lesɔnɔ eto betidi kpə ba nle búbə kédu étsyiko bufui. Nyaso Yesu ku wə bakasebi mánkɛ lefe lə bedi lesa kula tsya. Nyaso Yesu átɛyi mə nkə, “Bitə lə bo hã lə busu kaka lebiɔ lə busiə mfó butsyə ɔnwɛ seke.”

³² Nyaso bésu bédufə lə ɔklo lə besu kaka betidi ləmbə. ³³ Fɛɛ lefe nə bántɔɔ, betidi kpə ənyə mə bətsyə lekpɔ, nya béttsyetsyi bátɔ sɛtɔ bésu baka mfó budufə fɛ Yesu ku wə bakasebi dísu bédufə mfó. ³⁴ Se Yesu lebɔ lə ɔklo əmə únyə sitiditu siamə, mə asa ənə wə kafo itsyise bətsyə fe basamu ba ləmbə obebe. Nyaso útsyiko mə asa kpə bote itsyi lə Onanto əsuə.

³⁵ Lefe nə ditsyitsyo léyoo, wə bakasebi ányi bésu wə ɔflo nya bátɛyi wə bənkə, “Kale bolo. Nya kase mfo diyifo ntentii, bəəmbunyə kulesa bedi. ³⁶ Nyaso ləkə məmblɛ kusu lə bedu. Lə bedufə kəmə ku mbuto bo lefi mfoo, boofó lesatsyuə bunyə kaya kedi.”

³⁷ Yesu átɛyi mə nkə, “Mi kosatee, bitə mə lesatsyuə lə bedi.”

Nya bátɛyi wə bənkə, “Nyamfó ebofo fe utsyuə eto afa mflamfla eto kayofofó! Ala fə bobiasə nyamfo lə mə budi əsuə?”

³⁸ Nya Yesu létɔ mə nkə, “Abolo asia bɛnlɛ? Bisu bebe!”

Nya se bésu bábee, bátɛyi wə bənkə, “Abolo anɔ ku akpɛ ənuə ete ntə.”

³⁹ Yesu átɛyi wə bakasebi nkə bətə lə betidi bamə kenke lə bəsiə kasɔ lə sefa siamə əsuə mfó lə etsyukpa etsyukpa əsuə. ⁴⁰ Nyaso betidi bamfo kenke əsiə kasɔ lə etsyukpa etsyukpa əsuə ətsyuə fe betidi kolofa nya ətsyuə fe betidi awosi anɔ.

⁴¹ Nya Yesu dífi abolo ku akpɛ nyamə, nya se óbe kato, nya óso Onanto ani. Nya úbudi abolo nyamə nya úfi nnya útə wə bakasebi nkə bəsiə bətə etsyukpa etsyukpa nyamə. Nya úsiə akpɛ nyamə tsya nko útə mə. ⁴² Mba kenke lɛkɛ mfó édi bémi.

⁴³ Nya se wə bakasebi lɛsɛ didisa nə díbu bakɔɔ, díyi lefosi etsyitsya kplɛ ənuə. ⁴⁴ Nya mba dídi lesa nəmfo eto basani mate éyifo betidi akpi anɔ.

Yesu Áye Lə Ntu Ɔsuə.

⁴⁵ Lamfolamfo Yesu átɛyi wə bakasebi nkə bedufə lə ɔklɔ əmə lə besu umə wə baakpo Betsaida, lə ditumbukplɛ nəmə eto lekpake nə nse. Nya útə nkə sitiditu siamə sənsə sidu.

⁴⁶ Nyamfo eto kamaa, wuntsya édu óbe kɔtini komə nkə lə usu oto ola. ⁴⁷ Se éyo ketsyee, ɔklɔ əmə áyo ditumbukplɛ nəmə eto ntinti, Yesu mate hã díbu uńyə mfó. ⁴⁸ Úńyə nkə wə betidi édufə lə bulə əsuə ku kase bánlɛ ɔklɔ əmə bofo bonwa itsyise ufiebi lɛ bɔsɔ kələ mə. Nyaso lə kolensiənto kplɛɛ, Yesu áye lə ntu bomə əsuə úsu mə ɔfɔ eti nkə lə ɔye ofe. ⁴⁹ Nya se bənyə wə lə ntu bomə əsuəə, báfa bátɛyi bənkə, “Ɔko ni.” ⁵⁰ Məmbɛlɛ áte sikpi se bənyə wə.

Nyaso Yesu átɛyi mə lamfolamfo nkə, “Biante sikpi! Mɔ uni! Bimuə utu bɛlɛ!” ⁵¹ Nya óbe

údufə læ mə ɔklo əmə kafo, nya ete ufiebi əmə læye bɔsɔ. Nyamfo éyifo wə bakasebi yanii ku kafosu. ⁵² Itsyise bánte kase ko íbə fə útə betidi akpi anɔ bamfo lesa bédi banɔ. Mə nsusu mánkpa ko mə læ nyamfó əsuə, itsyise bámfo wə bánɔ.

Yesu Átsya Befimfi Lə Genesaret Eto Kasɔ.

⁵³ Se bédufə ditumbukplɛ nəmə eto lekpa ke nə nsee, báyifə læ Genesaret eto kasɔ. Nya bátsyasə mə ɔklo əmə mfó. ⁵⁴ Kase báyifə læ ɔklo əmə koo, betidi ətsyə Yesu lekpo. ⁵⁵ Nyaso betidi bamə étsyetsyi bésu bátəyi mə betidi kenke læ kasɔ kamə. Nya kaka ke bánɔ bə Yesu kpee, bətsyi befimfi læ mə belabekə əsuə báboko wə oflo. ⁵⁶ Nya kaka ke Yesu dísu koo, umə ni o-o, kebuto keni o-o, betidi ko díketsyi mə befimfi kaboko obia nya bánlɛ wə lekpa kpa bənkə utə læ betidi wə awu eto atosi ete. Nya mba díti nnyaa, əmuə ale.

7

Bianklenko Anasa Beni Onanto.

¹ Farisifɔ ku afi eto bateasa ba dítsyi Yerusalem əbə bátsyilama Yesu. ² Bənyə bə wə bakasebi si balɛ lesa budi nya bətsyuə məmflə mə ani fe kase Farisifɔ laate betidi bə ele bə bəflə. ³ Bənyə nyamfo bətsyə lekpo itsyise Farisifɔ ku Yudafɔ fɛfɛ kenke eeyifo læ mə batekoko, banakoko eto akpa nnya báyani bətsyə nya báte mə əsuə. ⁴ Nya læ báya lesa saa bətsyiko bikəkatekɔ tsyaa, ele bə bəflə mə ani fɛ læ bedi. Nya ele bə beyifo

læ afi kpæ nnya bəbə bétu, fe kase bəəflə akobe ku ekplibi ku kalotsyi.

⁵ Læ nyaso Farisifo ku afi eto bateasa átɔ Yesu bənkə, “Beso fə mba ntəkəko fə ləənyifo læ bo batekoko ku banakoko eto akpa əsuə? Nya banlə asa budi læ mə ani məfləmfəmfə əsuə?”

⁶ Yesu ələkə kənyə ótəyi nkə, “Enəmi ənəmi eto betidi bini! Lesa nə Onanto eto Unyeləkətidi Yesaya ləwəni ótəyi utsyə læ mi əsuəə, íbə ítə sitinti! Ótəyi bo nkə, Onanto átəyi nkə,

‘Betidi bamfoo, ənəmi ənəmi eto dibu ete bəətə mə,

banla mə itsyi læ mə akəəsi.

⁷ Bimba ete ini bə bálə mə lelabi buyifo.

Baate kawunsiə eto afi nnya betidi dítsyə fənkə mə afi ini.’

⁸ Nnya lete bə bifi mə kəfi bəkula nya bənle mi kawunsiə mfo eto akpa boté.”

⁹ Yesu esi ótəyi mə nkə, “Bekpe awəsu ətsyuə nnya biefi akayə læ nnya əsuə kani Onanto eto kəfi budi, keyifo batekoko ku banakoko eto akpa.

¹⁰ Onanato eto Unyeləkətidi Moses áwəni útsyə nkə, ‘Bu fə anto ku fə ambe. Ótəyi tsya nkə fəə ke léka fə anto ku fə ambee, ele bə balo fə.’

¹¹ Fəə biatəyi biənkə ələkə bə utidi ebofo lesa bəni butə wə anto ku ambe ba lesa lehiā, ku nsusu bə lesa nəmə eyifo kənke, kato taflatsyə ku nsusu bə wuufi lesa nəmə utə Onanto bomu eso. ¹² Nya əyə le bo akpa əsuəə, boata Onanto eto kəfi kebu. ¹³ Nko ini bə biefi mi bana eto akpa kaninsə Onanto eto afi. Nya bieyifo asa bamba kpə tsya fe nyamfo eto okle.”

Asa Nnya Laabo Ketsyi Utidi Eto Lekɔesi Laətə Weeyifo Lebuə Nɛ.

¹⁴ Lə nnya kamaa, Yesu esi ókpadi sitiditu siamə nkə bányi bafi wə. Nya ótɛyi mə nkə, “Mimble kenke bitsyue mə ato lə bɛnɔ kasɔ.

¹⁵ Lesa nə ke utsyuə dídi ókpe lə kafo əmbutə obiasə wə əsuə. Bomu lesa nə ke ditsyi lə wə lekɔesi ɔtɛyii, nnya ni lesa nə ləətə weeyifo lebuə nɛ. ¹⁶ Mimble kenke bitsyuə ato lə bɛnɔ mə kasɔ.”

¹⁷ Lə nyamfo eto kamaa, se údu lə mə ɔflo úsu diyoo, wə bakasebi átɔ wə bənkə uləkə lekpa nəmə eto kasɔ ote mə.

¹⁸ Yesu átɛyi mə nkə, “Lə bianno lekpa nəmfo kasɔ, nyalɛ mi nsusu əmbə kulesa kasɔ bofo bɔnɔ! Ekpa bənkə lesa nə didufə lə utidi kafo, əmbutə utidi əmə yifo lebuə, ¹⁹ itsyise yeendufə lə wə utu kəmiə. Wə kafo bomu yuudufə nya yɔɔyɛ ebɔ lə wə kafo fe lesa biabia.” Nyaso nnya Yesu letɛyi mfoo, ate bənkə didisa saa alɛkɛ itə budi.

²⁰ Nya úsukosə ótɛyi nkə, “Lesa nə ləbɔ itsyi lə utsyuə eto lekɔesii, ni laabiasə utidi nɛ. ²¹ Itsyise nsusu bua saa aabɔ ketsyi lə utidi eto lekɔesi kəmiə nya mu ləətə wəəyifo asa bua nɛ. Asa nyamfó ni fenkə, ləsonɔdi ku kuyu ku ditilo ku disənkpo, kusia kamafefe ku sidikpuu, ²² ku nsusu bua fifi ku kawɛ ku disiale, sidia tɛyitɛyi kabiasə utidi eto diye ku nsusu bua keklege fifi lə sisə ku sisia əsuə, nya ləənə utidi kakpe lə kofani əsuə, ənəmi səsəsəsə lə utidi bamba eto bikə əsuə, diye biasəbiasə, əsuə kato bobesə, ebukisa yifoyifo, koto mentsyue mentsyue. ²³ Asa

bua nyamfo kenke aabɔ ketsyi læ utidi eto lekɔesi, nya laabiasæ utidi nɛ.”

Usio Wæ Lenni Yudanya Áfo Yesu Ɔno.

²⁴ Nyamfo eto kamaa, Yesu édu úsu umæ utsyuæ læ Tiro eto kasɔ. Úsu diyo ditsyuæ kaka wóanla nkæ kuutsyuæ saa te nkæ okpe mfó, tsyafɛ wóamfo bɔbɔ. ²⁵ Mfóo, se usio utsyuæ wæ læwɔnɔ bua nle wæ ubi bulæ lenɔ nkæ Yesu kpe læ mfóo, úbæ wæ ɔflo akpa akpa nya óse akonki læ wæ ənəmi. ²⁶ Usio əmfo enni Yudanya. Bále wæ læ umæ wæ baakpo Foinike læ Siria eto kasɔ. Nya óle Yesu lekpa kpa nkæ ola læwɔnɔ nəmæ ɔbɔnko læ wæ ubi əsuæ.

²⁷ Nya Yesu lékpasæ wæ nkæ, “Tutɛɛ, tæ bekpefi lesa eto. Yanleke bæ befi bekpefi eto lesa bətə bakpa.”

²⁸ Læ nnya əsuæ usio əmfo ətə wæ mbuayɛ nkæ, “Ao, mɔ Onamute, bakpa bamæ læ ɔpunu kalɔ læ lesakedikɔ mfóo, ebunyə lesa nə bekpefi bamæ nlə budi eto nə lookpoo kasɔ bedi.”

²⁹ Nya Yesu lætɛyi wæ nkæ, “Læ kase fətə mbuayɛ mfo esoo, du esu diyo. Ebunyə se læwɔnɔ nəmæ díkayani fə ubi əmə.”

³⁰ Nyaso usio əmfo édu úsu diyo. Læ mfóo, únyə nkæ wæ ubi labe læ wæ kalabekɔ, nya læwɔnɔ bua nəmæ lénsisi wæ læ əsuæ.

Yesu Átsya Osani Wæ Ni Ototi Ku Ɔmumu.

³¹ Se Yesu lídu læ Tiro eto lekpa ke mfóo, óyɛ læ Sidon úsu Galilea eto Ditumbukplɛ kama kaka Kəmæ Lefosi kamə nkpe eti. ³² Nya mfóo, betidi bətsyuæ ákpa utidi utsyuæ wæ ni ototi ku ɔmumu

báboko wə ɔflo nya bále wə lekpakpa bə utəkə ani lə wə əsuə.

³³ Nyaso Yesu ákpa wə usuko lekpɔ kaka betidi ku kudu ləmbə, nya úfi wə animi ókpe wə lə ato. Útufə ntufə ókpo lə wə animi nya ókobe utidi əmə eto odiakami. ³⁴ Nya Yesu lébesə wə ənəmi óbe kato nya ówɔnɔ fũũ, nya ótəyi osani əmə nkə, “Hefata,” eto kasɔ ni bəə, “Sini!” ³⁵ Lamfolamfo, osani əmə eto ato ásini nya wə odiakami tsya lényankli nya ófo etiki budi.

³⁶ Yesu ákpe betidi ba dinyə mfó kɔfi nkə bántəyi utidi saa kulesa, itsyi lə lesa nə bənyə mfó. Fɛɛ bimbəə ete óninko mə, itsyise kase ókpe mə kɔfi, nko kə banlɛ nnya bokpantsyasə nɛ. ³⁷ Nya betidi ba kenke lenɔ asa nyamfóo, iyifo mə naa efensə! Nya bátəyi mə əsuə bə, “Wəəyifo lesa saa kukɔnɔ. Wəətə bamumu leedi etiki, nya batoti tsya laanɔ asa!”

8

Yesu Itə Betidi Akpi Ana Lesa Bédi.

¹ Lə eyi nyamfó əsuəə, betidi kpə əbə bátisya mfó. Nya se kulesa díməntsyə boodi esoo, Yesu ákpadi wə bakasebi óboko wə akɔ nya ótəyi mə nkə, ² “Betidi bamfo eto asa lɛ mə kaminšə, itsyise eyi ətsyə sɔɔ ni nyamfo se bəbə mə ɔflo nɛ. Nya məmɔɔ, kulesa ente boodi. ³ Lə nyani mə beluu, kukpensɛ ebɔlɛ mə kola disi lə kusu itsyise mə bətsyuə etsyi katsyontsyokɔ.”

⁴ Nya wə bakasebi lɛtɔ wə bənkə, “Se utidi luunyə lesa utə betidi bamfo lə mfiminti mfo bə bedi bemi?”

⁵ Mfó Yesu leto mə nkə, “Abolo asia nte mi?”
Bátəyi wə bənkə, “Abolo akuanse.”

⁶ Yesu átəyi məmble nkə bəsiə kaso. Nya úfi abolo akuanse nyamə, nya óso Onanto ani, nya úbudi nnya úfi útə wə bakasebi nkə befi bətə betidi bamə kenke. Nya mə tsya dífi nnya bésia bətə mə. ⁷ Akpə asiani tsya ətsyə. Yesu éfi nnya tsya nya óso ani. Nya úfi nnya útə wə bakasebi nkə besia nnya tsya bətə mə. ⁸⁻⁹ Betidi bamfó kenke édi bémi. Betidi bamə eto utu ebuyifo akpi ana. Se bédi bálosəə, bakasebi bamə áse abolo weləwəle nnya díbu nya íyi etsyitsya kplekple akuanse. Nnya kamaa, Yesu ələkə betidi bamfo kenke kusu nya bédu. ¹⁰ Nya Yesu ku wə bakasebi dídufə lə oklo báyila ditumbukple bésu Dalmanuta eto lekpake.

Farisifo Áto Yesu Bənkə Uyifo Ayanisa Ote Mə.

¹¹ Farisifo bətsyuə əbə Yesu oflo nya bətsyiko wə etiki bunənkə lə befi bato wə babe. Nyaso bátəyi wə bə uyifo ayanisa ətsyuə ote mə lə bate bə Onanto oflo útsyi úbə. ¹² Nyamfo ələ Yesu tinti nya óla əwəno nya óto mə nkə, “Beso kon mmi eto betidi laabəbə bə bəənyə ayanisa fe lə bafə banə? Kulefe, nle mi bəteyi minkə, membuyifo ayanisa nnya eto okle bela biə biənyə mfo!” ¹³ Nya údu lə mə oflo, nya úsinkli údufə lə oklo nya óyila ditumbukple nəmə úsu ni lekpake nə nse.

Yesu Əkə Mə Ato Lə Bidia Eto Asatete Əsuə.

¹⁴ Kase banle ditumbukple nəmə boyilaa, wə bakasebi bamə áta əsuə bəntsyi abolo kpə.
¹⁵ Nya Yesu letəyi mə nkə, “Bekpe kobe lə bitsyue

ato læ bɛnɔ etiki itsyi læ oka Herodes ku Farisifo eto əyənkiəsə əsuə.”

¹⁶ Lefe nəmfoo, mə sɔɔ dínyə mfó bánlɛ etiki búdi katɛyi bæ, “Lee nnya buuntsyi abolo kpə eso ɔnlɛ bɔtɛyi nkoo?”

¹⁷ Fɛɛ se Yesu nyi etiki nnya banlɛ bɔtɛyi esoo, óto mə nkə, “Beso bɛnlɛ etiki læ abolo butsyi əsuə? Ibə ese mómoo, biənyəto nye bɛnɔ kasɔ? Bitidi ato ko! ¹⁸ Bekpe ənəmi, tsya fɛ biənyə! Bekpe ato, tsya fɛ bianno! ¹⁹ Bíankloma lefe nə ménsie abolo anɔ míntə betidi akpi anɔ dídi? Etsyitsya kplɛ asia nnya wɛlɛwɛlɛ díbu díyi?”

Bátɛyi wə bənkə, “Lefosi etsyitsya ənuə.”

²⁰ Yesu esi óto mə nkə, “Nya læ lefe nə mínsiə abolo akuanse míntə betidi akpi anaa, nnya wɛlɛwɛlɛ díbuu, etsyitsya asia íyi?”

Bátɛyi wə bənkə, “Akuanse.”

²¹ Nya óto mə nkə, “Ibə ese mómoo, biante to futsyɛ mini?”

Yesu Átsya Unamba Utsyuə Lə Umə Wə Baakpo Betsaida.

²² Se Yesu ku wə bakasebi dídufə Betsaida, betidi bətsyuə ákpa unamba utsyuə báboko Yesu ku wə bakasebi ɔflo nya báɛ wə lekpa kpa bæ læ ufi wə kɔni utəkə læ wə. ²³ Yesu ákɔbɛ nwə əmə læ kɔni nya ókpa wə óbɔnko læ umə nti. Se útufə ntufə ókpo læ unamba əmə eto ənəmii, úfi wə ani útəkə læ wə əsuə, nya óto wə nkə, “Alɛ lesatsyuə bunyɛə?”

²⁴ Nya utidi əmə létakasə wə ənəmi óbɛ kato nya ótɛyi nkə, “Ee, nlɛ betidi bunyɛ, tsya beyifo fe eyi. Fɛɛ balɛ bɔyɛ katsyilama.”

²⁵ Nya Yesu disi útidi wə ənəmi. Lə lefe nuəfə nəmfoo, utidi əmə ásini wə ənəmi kukɔnɔ, nya wə ənəmi lékpa, nya únyə lesa saa kukɔnɔ. ²⁶ Nya Yesu díləkə wə kusu nkə udu usu wə diyɔ, wənsisinkli usu umə əmə nti.

Petro Áteyi Nkə Yesu Ni Nwə Onanto Lékpɔ ɔhile Útsyə.

²⁷ Lə nnya kamaa, Yesu ku wə bakasebi édu mfó bésu kebuto kətsyuə ka ləfi Kaisarea Filipi eto kasɔ eti. Nya lefe nə bánye lə kusu bantɔɔ, Yesu édi mə etiki óteyi nkə, “Bəteyi mə, futsyə betidi laateyi bə wə mini?”

²⁸ Bəteyi wə bənkə, “Bətsyuə lə bəteyi bə fə ni Ntufləsətidi Yohanes. Nya bətsyuə tsya nle bəteyi bənkə fə ni Onanto eto Unyeləkətidi Elia. Nya bətsyuə tsya nle bəteyi bənkə fə ni Onanto eto mba lələkə wə kənye eto mba kɔ eto okle ɔni.”

²⁹ Nya Yesu disi ótɔ mə nkə, “Mimi nkpə, owoe biebu biə wə mini?”

Petro áteyi wə nkə, “Fə ni nwə Onanto lékpɔ ɔhile útsyə.”

³⁰ Nya Yesu díkə mə ato nkə bánteyi ku utsyuə saa, lesa nə benyi itsyi lə wə mfo.

Yesu Édi Etiki Itsyi Lə Wə Kanyinyənyə Ku Wə Ukpə Ku Wə Businkli Kataka Īsuə.

³¹ Nya Yesu dítsyiko wə bakasebi asa ətsyuə bóte, óteyi mə nkə, “Ele bə ibə itə bə Utidi Eto Ubi nyə kanyi lə Yudafɔ eto beninə ku besumunyə ninə ku afi eto bateasa eto ani, bani wə. Boolo wə, tsya lə diyi tsyəfəə wootaka.” ³² Ɔteyi mə

nyamfo ókpasə, bə lə banɔ kasɔ. Nya Petro lékpa wə usuko ɔflo wonko wə inuə, nya óninko wə.

³³ Tsyaa, se Yesu díkənsə óbe wə bakasebii, údi etiki ku ləblɔfi ókpe Petro nkə, “Obansam, du mɛ lə ɔflo!” Nya ɔlɔ bótɛyi nkə, “Anla asa nnya Onanto lala, bomu nnya betidinini lala!”

³⁴ Nyaso Yesu ákpadi betidi eto ditsyukpa nəmə ku wə bakasebi óboko wə ɔflo nya ɔtɛyi mə nkə, “Lə utsyuə ala nkə wəətəkəko mɛɛ, ele bə uləkə wə ato ku wə əsuə utsyiko lə wə alasa əsuə nya lə utsyi wə uyikabie utəkəko mɛ.

³⁵ Itsyise nwə ke lela nkə wələkə wə nkpəə, woo nyansə mu. Nya utidi wə ke loonyansə wə nkpə lə mɔ disi ku lə Ditiki Sɛɛ nəmfo esoo, wuunyə nkpə manlo. ³⁶ Nte kutəkə ko utudi luunyə lə kawunsia kamfo eto bikə kenke afiani wə bele fɛ wənnɔyə nkpə manlo? ³⁷ Nye be utidi luufi ofloma ko bə lə unyə nkpə manlo? ³⁸ Mɔmɔ mfoo, betidi kpə lə asa bua buyifo ketsyi kama kakpe Onanto. Nyaso lə utsyuə efi mɔ ku mɔ asatete fe afanisa mɔmɔɔ, wuuntsya ebudi kofani lə mɔ, Utidi Eto Ubi, ɔflo lə lefe nə muubə ku Onanto eto Batɔnkpe kɛkɛ ku lə Onanto eto diyənde əsuə.”

9

¹ Nya Yesu disi ɔtɛyi mə nkə, “Nlɛ mi bótɛyi sitinti minkə mi bətsyuə əmbukpə isu ese lefe nə biunyə Onanto əmə eto sekakedikɔ luubə ku əsuəale.”

Yesu Eto Əsuə Bofloma.

² Eyi akua eto kamaa, Yesu ákpa Petro, ku Yakobo ku Yohanes bəsu kɔtini kutsyuə əsuə. Mə

hã dísu bəsiə mfó. Lefe nə bakasebi bamfo ríle bobee, bənyə bə Yesu eto ditsyəbi áfloma. ³ Nya wə awu nnya onkpe léfloma íflubi futututu enso kase utidi luuflə wə bikə ku ntu biole nya benle buyənde.

⁴ Nya bənyə Onanto eto bənyeləkətidi ba koko, Mose ku Elia ləbɔ bánle etiki budi ku Yesu.

⁵⁻⁶ Sikpi əmuə bakasebi bamə kenke itsyise bánte lesa nə bánle bətəyi. Nya Petro wə dímanthe lesa nə woatəyi, létəyi Yesu nkə, “Oteasa, bo mfo eto bubə aləke tinti. Tə lə boto ebu ətsyə. Loni itə fə, loni itə Mose, nya loni tsya itə Elia.”

⁷ Nya lesəmiloku ditsyuə díbə díti məmble kenke, nya bánɔ ɔkɔɛ ləbɔ utsyi lə asəmiloku nyamə əsuə nle bətəyi nkə, “Nwə mfo ni mə ubi lala wə mankeko. Bitsyue wə koto.”

⁸ Akpaakpa mfóo, bátsyilamasə ənəmi tsya bənyə kuutsyuə saa enso Yesu hã rnyə ku mə mfó.

⁹ Lefe nə bəsinkli banle kətini komə bəyifə kəbə kasɔɔ, Yesu əkə mə ato nkə, “Biantəyi kuutsyuə lesa nə bínyə mfo isu ese bə, mə, Utidi Eto Ubi, ataka ntsyi ɔkomə mbə.” ¹⁰ Bėti etiki nyamfo bákpe lə mə nti, fə lə mə mate sii, nya bákato mə əsuə bənkə, “Be ni bə wootaka utsyi ɔkomə ubə eto kasɔ?”

¹¹ Nya bátɔ Yesu bənkə, “Beso afi eto bateasa bamə laatəyi bənkə ele bə ibə bə Onanto eto Unyeləkətidi Elia tɔ Kristo eto bubə?”

¹² Yesu átəyi mə nkə, “Sitinti baatəyi. Ele bə Onanto eto Unyeləkətidi Elia tɔ Kristo eto bubə lə ubə ɔlɔ lesa saa utsyə. Fɛɛ bəwɔni bákpe lə Awɔnisa Kenke Eto Kukuə tsya bə Utidi Eto

Ubi ebudi ohiã tinti nya bɔɔni wə. Be bibu biə nyamfo tsya ɛ bote? ¹³ Nɛ mi bɔteyi minkə Onanto eto Unyeləkətidi Elia búbə koko. Fɛɛ betidi mámfo wə ku dibu. Bomu béyifo wə kase ke bála. Nyamfo əbə itə fe kase Onanto eto benyeləkətidi ɛwɔni bətsyə ɛ Awɔnisa Kenkɛ eto Kukue əsuə.”

Yesu Ála ɛwɔɔ Bua Nə Dísiə ɛ Osaibi Utsyuə ɛsuə.

¹⁴ Lefe nəmfoó, se Yesu ku bakasebi itsyə bamə dísinkli bəbə bakasebi fɛfɛ oflɔɔ, bənyə bə betidi kpə ńyə bətsyilama mə, nya afi eto bateasa bətsyuə nɛ mə etiki bunə nko. ¹⁵ Se betidi bamfó kenke dínyə Yesu nɛ bubəə, íyifo mə yanii, nya bətsyetsyi bésu bətsyako wə bəsiəsə wə.

¹⁶ Yesu ótɔ wə bakasebi bamə nkə, “Nte kənə ka mi ku mə nɛ?”

¹⁷ Nya osani utsyuə wə ńyə ɛ betidi bamə nti ɛteyi Yesu nkə, “Oteasa, nkpa mɔ ubi mboko fə oflɔ, itsyise ɛwɔɔ bua si wə ɛ əsuə itə waamfo etiki budi. ¹⁸ Lefenə ke ɛwɔɔ bua nəmfo nɛ wə buləə, dietsyi wə kasɔ ɛ kasɔ, nya efu laabɔ wə ɛ kɛnyɛ nya woayimi anyi, nya wə əsuə kenke laasie kəkləkə. Nya minkpa wə mimboko fə bakasebi minkə ɛ batsya wə, fɛ bamfo.”

¹⁹ Nya Yesu ɛteyi mə nkə, “Ei! Mii, mmi eto betidi, mi bofo kanɔ əmbə ale! Nte lefe nə eto okle ele bə bonko mi yɛ fɛ ɛ befo bɛnɔ? Nye nte lefe kəntsyɛ nə ele bə nyenko mi fɛ ɛ bɛnɔ asa kasɔ? Bekpa ubi əmə beboko mɛ!” ²⁰ Nya bákpa wə búsuko Yesu. Nya kase ɛwɔɔ bua nəmfo dínyə Yesu kɔ, dítinkəsə ubi əmə nya díne

wə læsɔ lə kasɔ lenlɛ bowaninsə, akaminansə lə kasɔ, nya efu nlɛ bɔbɔ lə wə kɛnyɛ.

²¹ Nya Yesu lɛtɔ wə anto nkə, “Se ítsyiko wə buyifo mæ, yóɔ klɛ?”

Osani əmə áteyi wə nkə, “Ítsyə wə kasɔ lə wə sikpefi lefe ke. ²² Lɛwɔnɔ nəmə aakplatsya sesiasesia nkə lə lelo wə, lə ibə nkoɔ, dietə nkə lə udu ɔnɔ udufə lə utə nye ntu əsuə. Nlɛ fə lekpaɔ, nyə bo kaminsə, lə ebofo lə awunsə ko bo!”

²³ Yesu áteyi wə nkə, “Beso faateyi mɛ fənkə lə mofo? Lesasa ebofo bubə kətə lə afo mɛ ɔnɔ.”

²⁴ Lamfolamfo, ubi əmə eto anto áteyi bembembe nkə, “Mfo nno, tsyaa bumbə ale kpə. Wunsəko mɛ lə mɔ bofo kanɔ lə bumuə ale.”

²⁵ Nya lefe nə Yesu dínyə nkə betidi kpə lə bɔkpɔ lə banyi bafi mæ, údi lɛwɔnɔ nəmfo etiki nkə, “Lɛwɔnɔ bua nə lətətə betidi lanno ku leendi etiki, nlɛ fə bɔteyi minkə bɔ lə ubi əmfo əsuə, nya mensi sinkli edufə lə wə kulefe kulefe bio!”

²⁶ Lɛwɔnɔ nəmfo áfa bembembe, nya dítkəsə wə kekleke nya lɛbɔ wə lə əsuə. Ubi əmfo álabɛ mfó fe bukpə ukpə. Nya utsyuə saa wə ínyə mfó nlɛ bɔteyi nkə, “Úkpə!”

²⁷ Nya Yesu lɛkɔbɛ ubi əmə lə kɔni nya ótaka únyə.

²⁸ Lə nyamfo eto kama se Yesu dídufə diyo ditsyuə, wə bakasebi átɔ wə buɛ bənkə, “Beso bo dímamfo lɛwɔnɔ nəmfo bola kələkə lə ubi əmə əsuə?”

²⁹ Nya Yesu lɛteyi mə nkə, “Sianɔpa utidi əmə éboto ola sesia sesia sesia nya ókle kɛnyɛɛ, nya fɛ wofo lɛwɔnɔ nəmfo eto okle bola kələkə lə utidi əsuə nɛ.”

Yesu Esi Údi Etiki Itsyi Lə Wuukpə Əsuə.

³⁰ Yesu ku wə bakasebi édu mfó báye lə Galilea eto kaso. Yesu mánla nkə kuutsyuə saa te kaka onkpe, ³¹ itsyise úkate wə bakasebi asa. Ɔteyi mə nkə, “Osani utsyuə ebufi Betidi kenke eto Ubi utə, nya wuufi wə utə betidi nkə balo. Nya lə diyi tsyəfə əsuəə, wuusinkli otaka ubə nkpə.” ³² Tsyə banno lesa nə óteyi mə mfo eto kaso, nya báte sikpi ku kase booto wə ditiki nə óteyi mfo eto kaso.

Yesu Áte Asa Itsyi Lə Nwə Ndi Ɔkplenyə Kenke Əsuə.

³³ Se bésu bédufə Kapernaum eto uməə, bésu bédufə diyo ləni. Mfóo, Yesu átə wə bakasebi nkə, “Nte ditiki nə bənle bunə lə mi nti se bónle bubə?” ³⁴ Tsyə bəntə wə mbuaye saa. Itsyise se bánle bubəə, bəkənə etiki bə bala bə baate utsyə wə ni okple kenke lə mə nti.

³⁵ Nya Yesu dísiə lə kaso nya ókpadi wə bakasebi lefosi inuə bamə, nya óteyi mə nkə, “Mi futsyə lela nkə weedi Ɔkplenyə kenke lə mi ntii, ele bə uyifo wə əsuə fenkə nwə ləmbə kulesa nti, nya wuusumu wə bətsyuə.”

³⁶ Nya útə dikpefi díbə únyə lə mə seto. Nya útsyi dikpefi nəmfo útəkə lə wə akpa nya óteyi mə nkə, ³⁷ “Utsyuə saa léfo dikpefi lə mə disii, mə ni ófo. Nya utsyuə saa loofó mɛɛ, inni mə mate ete ofo. Bomu ófo mə Anto wə létsyese mɛ tsyə.”

Utsyuə Saa Wə Leenkisi Mii, Uyifo Ləni Ku Mi.

³⁸ Nya, okasebi wə baakpo Yohanes leteyi Yesu nkə, “Oteasa, búnyə osani utsyuə wə nle awonɔ

bua bóla læ fə diye əsuə. Nya búti wə kusu buə usinkli ɔye, itsyise umbə læ bo nti.”

³⁹ Yesu átɛyi mə nkə, “Bienti wə kusu, itsyise utsyuə saa wə leeyifo ayanisa læ mə diye əsuəə, əmbudi mə etiki bua. ⁴⁰ Nya utsyuə saa wə læənyə læ bo əsuəə, bonko wə eyifo bani.

⁴¹ “Nya mətə læ bete biə utsyuə saa wə luutə mi ntu nkə binə itsyise biyifo mə balee, Onanto ebofo wə nnya kayo.

Biəntə Kulesa Saa Lə Iti Mi Bofokanɔ Kusu.

⁴² “Lə ibə bə utidi utsyuə ətə bə dikpefi nə díkənyə bofokanɔ læ mə ésinkli kama læ nnya əsuəə, wuunyə kotonənə tinti. Lə befi ukua bátsyasə læ lebambi kplə əsuə befi bakpe wə læ simuə befi wə bato bakpe læ ditumbukplə, yɔɔləkə itə wə eso.

⁴³⁻⁴⁴ “Nyaso læ fə kɔni kɔni abiasə fə bofokanɔ, tɔnɔ læ ala ko ələkə! Eləkə bə ye kɔni kɔwɛ esu nkpə manlo kəmiə enso bə kɛ ani ənuə læ Onanto læ oto fə okpe læ ditəfenku əsuə kaka baatonsə asa bua. ⁴⁵⁻⁴⁶ Nyaso læ fə kokpra kɔni laabiasə fə bofokanɔ, la ko ələkə. Eləkə eso bə kɛ kokpra kɔwɛ læ ənyə nkpə manlo, enso bə akpra ənuə kɛ fə læ bato fə bakpe læ utə əmə kəmiə. ⁴⁷ Nya læ fə dinəmi aakpra fə kesuko asa bua kəmiəə, nə ni ələkə. Eləkə eso læ akpe dinəmi ləwɛ nya fedufə læ Onanto eto sekakedikɔ enso bə kɛ ənəmi ənuə læ befi fə bato bakpe læ utə manlo kəmiə, ⁴⁸ wə eto asa bətɛyi bənkə, ‘Ekuklubi nnya laabiasə asa mfóo, əənkprə kulefe.

Nya ute wə laatonsə asa mfóo, aanni kulefe.’

49 Itsyise fe kase beefi mba kakpe læ didisa dialɛkɛɛ, nko kə Onanto leefi kanyinyənyə eto utə kakpasə wə betidi əsuə nɛ.

50 “Mba aɛkɛ. Fɛ læ bɔyansə mu kamini, ənsiəmbofo kamini bokpe læ mu bio. Nyaso, tə mba eto lɛɛkəsə læ bɔkɛ mi læ əsuə. Lə bisia læ diyua əsuə ku mi bətsyuə.”

10

Yesu Áte Asa Itsyi Lə Kusə Ku Kusianini Əsuə.

1 Nya se Yesu dídu mfó, óyila Yordan eto ketu úsu Yudea eto kasɔ. Betidi kpə esi bəbə bətsyilama wə mfó tsya, nya úkate mə asa mfó itsyi læ Onanto əsuə fe kase úkala buyifo.

2 Farisifo bətsyuə əbə wə ɔflo bə læ itə kusu, læ bənyə kusu læ wə əsuə. Bətɔ Yesu bənkə, “Nyale Onanto eto kɔfi ətə kusu bənkə osani ɔni wə usiə?”

3 Nya Yesu tsya lítə mbuayɛ ótə mə nkə, “Nte kɔfi ko Mose lékpe mi?”

4 Bətə mbuayɛ bənkə, “Mose ətə kusu nkə osani wə ke lensianla wə usiə, ɔwɔni kukuə læ utə wə bote fɛ læ oyani wə.”

5 Yesu áteyi mə nkə, “Moses wəə ni Onanto eto Unyeləkətidi áwɔni nyamfo nko útə mi itsyi læ mi letotidi eso. 6 Taa kawunsiə eto diyifofee, Onanto éyifo osani ku usio, fe kase bəwɔni bákpe læ Kukuə Kɛnkɛ əsuə. 7 Awɔnisa Eto Kukuə Kɛnkɛ áteyi nkə, ‘Lə nyamfo eso osani du læ wə anto ku ambe ɔflo usu ɔkɔ ku wə usiə, 8 nya mə inuə bamə loofiani əsuə eto sinə sɔni.’ Nyaso læ Onanto eto ənəmii, bafiani utidi ɔni. Inni inuə!

⁹ Nyaso betidi ba Onanto lɛkɔ banii, kawunsia kamfo eto utidi saa əmbə kusu wəəsənsə mə nti.”

¹⁰ Kama se bésu bédufə lə diyo kəmiə, wə bakasebi áto wə asa itsyi lə ləsanə óteyi lə kɔfi komfó əsuə. ¹¹ Yesu ələkə kasɔ óte mə nkə, “Osani wə looyani wə usiə usu nya úfi obambaa, udi kɔsɔɔ, ota wə usiə koko əmə ubu. ¹² Nko ke lə usio ani wə usiə nya usu usiəko úsiə kusə bamba tsyaa, wuntsya akpo kusə óta wə usiə koko əmə úbu.”

Yesu Ákpo Bekpefi Bətsyuə Atsyɔ.

¹³ Lə lefe nəmə tutuutu, betidi bətsyuə ákpa mə bebi báboko Yesu ɔflo bə lə ufi wə ani utəkə mə lə əsuə okpo mə atsyɔ. Fɛɛ wə bakasebi ənyənki bákpe mə. ¹⁴ Se Yesu dínyə nyamfoo, kafo ányi wə nya óteyi wə bakasebi nkə, “Bitə lə ekpefi lə bəbə mɔ ɔflo, bienti mə kusu. Itsyise Onanto eto sekakedikɔ tə itə mba laabokosə mə əsuə kasɔ fe kase ekpefi kəkə bamfo leeyifo. ¹⁵ Nlɛ mi bɔteyi sitinti minkə utidi wə ke ləmbɔfo Onanto eto Sekadidi fe kase dikpefi kəkə laabokosə wə əsuə kasɔ, wəmbudufə Onanto eto sekakedikɔ kulefe.” ¹⁶ Nya óbuta dikpefi saa, útəkə wə kɔni nya ókpo mə atsyɔ.

Otabinyə Utsyuə Áto Yesu Kusu Ko Wɔɔye Lə Unyə Nkpə Manlo.

¹⁷ Lefe nə Yesu létaka únyə lə uluu, osani utsyuə étsyetsyi úbə óse akonki lə wə ənəmi, nya óto wə nkə, “Oteasa Sɛɛ, be ele bə nyifo fɛ lə nyə nkpə manlo?”

¹⁸ Yesu áto wə nkə, “Eyi lesa nə eso fakpadi mə fə, ɔsɛɛ? Utidi saa meenyifo ɔsɛɛ, enso Onanto.

19 Eyi Onanto eto afi nnya kenke. Manlo utidi, mankpo kusə nye mamfe fə usiə kama, menyu, manteyi sidia lə fuutsyuə əsuə nye ala wə kənye, manwɛ utidi lə afo wə bikə, bu fə anto ku fə ambe.”

20 Osani əmfo esi ɔteyi wə nkə, “Oteasa, idu lə mɔ sikpefi ibə ese lə mii, nɛ afi nyamfo kenke budi.”

21 Yesu ábe wə ku lelabi nya ɔteyi wə nkə, “Lesakpa ləni hā dibu ele bə yifo. Su lə esu efi fə bikə bia kenke nte fə ate, lə efi atabi nyamfó efi ətə bakombo. Lə nnya əsuə, ebofiani otabinyə lə Onanto eto. Nyamfo eto kamaa, du lə əbə ətəkəko mɛ lefe saa!”

22 Se osani əmfo ləno ditiki nəmfoo, élo wə ani nnya údu ku nkuɛnlo, itsyise bikə kpə kpe wə.

23 Yesu átsyi ɔwininsə nya ɔtsyilamasə ənəmi óbe wə bakasebi nya ɔteyi mə nkə, “Ekpe ale tinti fə batabinyə lofo Onanto eto sekakedikɔ budufə.”

24 Ditiki nəmfo ábiasə wə bakasebi bamfo eto nsusu. Fɛɛ Yesu esi áteyi mə nkə, “Mɔ bebi, bəno kase enkpe ale itə batabinyə bə bənyə kusu bedufə Onanto eto sekakedikɔ! 25 Mə mfó budufə kpe ale eso kase ɔdɔmini ku lekoko looye lə okaasa eto ofo ofe!”

26 Se ɔteyi mə ditiki nəmfoo, isi ébiasə mə nsusu ekpe blɛmblɛ! Nya banɛ mə əsuə bɔtɔ bənkə, “Nyale owoe ko luunyə nkpə manlo?”

27 Nyaso Yesu ábe mə tūū, nya ɔteyi nkə, “Utidi saa əmbə lofo nyamfo buyifo. Fɛɛ wə Onantoo, wə ebofo lesa saa buyifo.”

28 Nya Petro dídi etiki ɔteyi nkə, “Bóyani bo lesa saa butsyə bubə butəkəko fə!”

²⁹ Nya Yesu leteyi nkə, “Nlɛ mi bɔtɛyi minke mimi ebunyə bikə kpə enso mbia béyani bitsyə. Itsyise utidi saa wə léyani wə oto nye bayimisanɩ nye bayimisiɔ, nye ambe, nye anto, nye wə bebi, nye wə okuɛ útsyə lə mɔ butəkəko esoo, nya lə usənsə Ditiki Sɛɛ nəmfoo, ³⁰ wuunyə asa nyamfó eto nnya kolofa ku kama lə kasɔ kamfo. Wuunyə kato ku bayimisanɩ ku bayimisiɔ, ku ambemə ku bebi ku kakue kpə. Fɛɛ betidi ebokpe wə bulə tsya. Nya nyamfó eto kamaa, wuunyə nkprə manlo lə kawunsɩə fɔfɔ ka luubə. ³¹ Fɛ betidi kpə ba ntɔ sɛtɔ mɔmɔɔ, ebubə bafe kama. Nya mba nkpe kama mɔmɔɔ, mə loofe batɔ sɛtɔ nɛ.”

Yesu Esi Údi Etiki Itsyi Lə Wuukpə Əsuə.

³² Lə lefe nə bányɛ lə kusu baatɔ lə Yerusalem eeto uməə, Yesu átɔ sɛtɔ fɛ wə bakasebi dítəkə. Nya bulə butsyuə eto okle dídufə lə bakasabi bamfó əsuə nya sikpi dímuə betidi ba ntəkəko mə tsya. Yesu esi ókpadi wə bakasebi nya ókpa mə úsuko kaka kudu ləmbə nya ótɛyi mə asa nnya ləəbə wə butu.

³³ Ɔtɛyi mə nkə, “Bɛnɔ! Bɔtɔ lə Yerusalem eto umə kaka boomuə mɛ, mɔɔ ni Utidi Eto Ubi, nya boofi mɛ bakpe lə besumunyə ninə ku afi eto bateasa eto ani. Boolo mɛ dikpəkpi nya buufi mɛ bakpe lə mba lenni Yudafo eto ani. ³⁴ Nya bookpe mɛ kɔfiɔ, nya bootufə ntufə bakpo mɛ lə əsuə, bable mɛ, balo mɛ. Fɛɛ lə diyi tsyɛfə əsuəə, muusinkli ntaka mbə nkprə bio.”

Yakobo Ku Yohanes Álɛ Yesu Lekpakpa Bə Utsyə Mə Lə Nkplɛkɔ.

35 Nya Sebedeo eto bebi ba ni Yakobo ku Yohanes díbà Yesu òfò nya báyeyi wə bankə, “Oteasa, bokpe kətsyuə boə boateyi lə eyifo ətə bo.”

36 Yesu átə mə nkə, “Be ini?”

37 Báyeyi wə bənkə, “Lə əsiə lə fə lekankpomə lə fə sekakedikə eto diyənde əsuə, bo tsya aala boə lə bubə busiə lə fə akə mfó. Bo ɔni lə usiə lə fə kodianani nya unuəfə tsya lə usiə lə fə kəməni.”

38 Yesu áteyi mə nkə, “Biante lesa nə bənle bəɔɔ! Befo bənɔ biə biofo ntu bunə lə kanyi eto ləkəbe nə məənə əsuə? Nya biofo ntuflesəfləsə eto lekpa nə mofo lə kawunsiə mfo bofo?”

39 Nya bətə mbuayə bənkə, “Bofo.”

Yesu áteyi mə nkə, “Ee, biofo bunə lə ləkəbe bua nə eto okle məənə, nnya biofo ntu fləsəfləsə eto lekpa nə eto okle maafə mfo. 40 Fɛɛ mimbə kusu bə nləkə utidi wə luusiə lə mə kodianani nye kəməni. Mə Anto wə ni futsyə luutə betidi ba úkalə mfó utsyə útə.”

41 Lefe nə bakasebi lefosi fɛfɛ lənɔ etiki nyam-foo, bənyə ɔblə bákpe Yakobo ku Yohanes.

42 Nyaso Yesu ákpadi məmblə kenke utsyə nya óteyi mə nkə, “Biyi biənkə Aba eto beninə kpe əsuəale lə mə betidi ba nkpe lə mə kalə əsuə. Nya nkomə eto beninə tidi bamfó akɛ ale əkələkə kayinkə mba nkpe mə kalə. 43 Fɛɛ yanle bə itsyə nko lə mi nti. Lə mi nti eto utsyuə aala nkə weedi ɔtɔnkɔtɔnkoo, ele bə obokosə əsuə kasɔ usumu bafɛfɛ. 44 Nya lə mi nti eto utsyuə aala nkə woafə diye kplɛɛ, ele bə uyifo nwə ləənnə əsuə, laabokosə əsuə kasɔ kabɛbɛ bafɛfɛ eto lələkəsə.

45 Itsyise Utidi Eto Ubi kulaa tsya məmbə nkə

besumu mɛ. Bomu bæ læ usumu betidi læ ufi wə nkpə utə læ betidi kpə eto diləkə.”

Yesu Átsya Unəmba Bartimeo.

⁴⁶ Nnya kamaa, Yesu ku wə bakasebi ésu Yeriko. Nya se banlɛ budu læ umə əməə, betidi kpə ətəkəko mə. Nya lefe nə bányɛ kusuu, báfe unəmba utsyuə wə baakpo Bartimeo eto kaso ni Timeo eto ubi. Nya unsi mfó ɔnlɛ asa boto.

⁴⁷ Se ɔno nkə Yesu Nasaretnyə uni nlɛ bofee, ófa bembembe ótɛyi nkə, “Yesu! David eto ubi! Be mɛ læ ənyə mɛ kaminsə!”

⁴⁸ Betidi kpə ba nlɛ bofe mfó ənyənki bákpe wə bənkə usinkli ɔyɛ kudu komə. Tsyə mfe fɛ usi ófa bembembe nkə, “David eto ubi! Be mɛ læ ənyə mɛ kaminsə!”

⁴⁹ Nya se Yesu leno nkoo, úkənə únyə nya ótɛyi nkə, “Bekpadi wə bitə mɛ.”

Nyaso bákpadi unəmba əmfo bátɛyi bæ, “Nyə disuəyuə! Taka mlə, itsyise ɔlɛ fə bokpadi.”

⁵⁰ Lamfolamfo, úləkə wə awu kato óto ókpe, nya ótaka únyə, nya úsu Yesu flɔ.

⁵¹ Yesu áto wə nkə, “Be faala fə nyifo ntə fə?”

Unəmba əmə átɛyi wə nkə, “Oteasa, tə læ mo ənəmi læ esini læ nkənyə!”

⁵² Nya Yesu letɛyi wə nkə, “Su. Fə bofokano átsya fə.” Nya lamfolamfo, wə ənəmi lesini nya útsyiko asa bunyə. Nya útəkəko Yesu, nya məmblɛ lídu.

11

Báfo Yesu Fe Oka Lə Yerusalem.

¹ Lefe nə bányi bafi Yerusalem nya bédufe Betfage ku kaka letsyilama Betania mfóo, báyo Nnuəbi eto Eyi eto Kətini. Nya mfó Yesu lékpe wə bakasebi inuə nkə beákatə. ² Nya óteyi mə nkə, “Lə bidufe umə tutεε, biunyə biənkə bátisyasə oflimubi wə ku ukuə, wə ku utsyuə saa dímasiə to unyə. Benyankli wə lə ukuə lə bifi wə beboko mε. ³ Nya lə utsyuə átə mi nkə, ‘Beso benle wə buləkə?’ bəteyi wə biə mi Onamute ahiā wə, nya businkli bufi wə boboko mle.”

⁴ Nyaso betidi inuə bamfo ésu nya bənyə bə oflimubi nyə lə ukuə, únyə lə futsyə eto kəsia. Nya bələkə wə ku ukuə əmə. ⁵ Betidi bətsyuə ba nyə mfó átə mə bənkə, “Be benle wə bonyankli keyifo ko?” ⁶ Bátisyi mə fe kase Yesu leteyi mə. Nya mə tsya dítə mə kusu bə banyankli wə. ⁷ Se báboko Yesu ubuki əmfoo, bəfi mə mfiə bətəkə lə ubuki əmə əsuə nya Yesu lébe úsiə lə wə. ⁸ Betidi kpə éfi mə mfiə bətsyə lə kasə, bətsyuə tsya əfəsə kale ku afanto lə kaflo bésense bákpo lə kusu bə lə ɔye ofe. ⁹ Betidi ba kenke ntə setə ku mba ntəkə kamaa káfa bembembe kákateyi bə,
“Hosiana!

Bəle atesə butə nwə nle bubə lə Onanto eto diye əsuə.

¹⁰ Bifi atesə bitə bo ona Oka David eto sekakediko sia nle bubə.

Hosiana itə Onanto wə nkpe kato fanlofanlo.”

¹¹ Se údufe Yerusalem, Yesu ésu Yudafo eto Disumuyo. Nya ótsyilamasə ənəmi óle ola óbe lesa saa nə nkpe mfó. Fεε se kale mfe nle bolo esoo, údu úsu Betania ku wə bakasebi.

Yesu Ékudi Kuidiyi Kutsyuə.

¹² Se kale dísiə, bédu læ Umə Betania bánle bubəə nya kukpense étsyiko Yesu bəle.

¹³ Únyə kəsese nkə kuyi kutsyuə ko laawə eyibibi baakpo fiki ko léta afanto kpə nyə mfó. Nyaso úsu nkə weesu obe læ kónwə ebibi. Fəe se úsu údufə kuyi komə kalə, únyə nkə kóanwə ebibi saa. Afanto hā kóto. Lefe nə ele bə kusi kónwə tsya mányo tə. ¹⁴ Nyaso Yesu édi kuyi komə etiki óteyi nkə, “Ensiembənwə ebibi bio.” Wə bakasebi áno se óteyi nko.

Yesu Ála Mba Nle Bikə Bote Lə Disumuyo.

¹⁵ Se bésu bédufə Yerusalem, Yesu ésu Yudafo eto Disumuyo, nya útsyiko betidi ba nle asa bote ku mba nle bikə bote læ diyo nəmə bola, úkə mba nle atabi bofloma eto kapunu úwi. Nya úkə mba nsi banle ablonima tsya bote eto akpomə úwi itsyise wóanla nkə kuutsyuə saa ubə ukaye læ Disumuyo oflo mfó kafe ku mə bikə.

¹⁶ Nya wóantəno nkə kuutsyuə saa fi kulesa úbə kateko læ kesumuko eto diyo nəmə mfó.

¹⁷ Nya óte betidi bamfó asa óteyi mə nkə, “Bawəni læ Awənisa Kenke Eto Kukuə əsuə bə, Onanto áteyi nkə,

‘Bookpo mə diyo,

diyo nə kawunsiə kenke eto betidi luubə bato
ola bətə Onanto.’

Fəe mimi éfi ni bíyifo beyu eto kabiokə katafa betidi.”

¹⁸ Besumunyə ninə ku afi eto bateasa ba ləke mfó áno etiki nnya Yesu leteyi. Nyaso bábebe kusu ko bəoye balo wə. Tsyaa bale sikpi bote eye læ kase betidi ba tā laala wə asatete eso.

¹⁹ Se éyo ditsyitsyo lefee, Yesu ku wə bakasebi édu lə Yerusalem eto umə əmə.

Bənyə Bə Kudiyi Komə Yesu Díkudi Ēkpə.

²⁰ Se kale dísiə eto olesiəə, nya se bánye lə kusu bánle bubəə, bənyə bə kudiyi komə ébukpə koko kenke taa ko keyudu ke. ²¹ Petro ákloma lesa nə díbə, nya óteyi Yesu nkə, “Oteasa, be kuyi komə fékudii, kúkpə!”

²² Yesu áteyi mə nkə, “Befo Onanto bəno. ²³ Nlɛ mi bɔteyi sitinti minkə, utsyuə saa wə lɔteyi kɔtini komfo nkə kɔnyi kusu kudufə lə lekpoə, nya wanyaki lə wə lekɔəsi, nya ófo óno nkə lesa nə óteyi ebubə itəə, Onanto ebuyifo nnya utə wə. ²⁴ Nyaso nlɛ mi bɔteyi minkə, lesa nə ke biɔto Onanto eyɛ lə olatoto əsuəə, befo bəno biə dioka mi kɔni. Onanto ebuyifo lesa nə mə utə mi. ²⁵ Nya lə bibə ola katokɔ kətə Onanto nya bekloma biə utidi utsyuə áta mi úbuu, bifi betsye wə itə bə mi Anto wə nkpe kato tsyaa, lə ufi mi asa bua ɔtsyɛ mi. ²⁶ Fɛɛ lə biemfi betsye wəə, mi Anto wə nkpe kato tsya əmbufi ɔtsyɛ mi.”

Betidi Ákpe Kədiə Ku Yesu Itsyi Lə Kaka Wə Ēsuəale Ditsyi.

²⁷ Yesu ku wə bakasebi édufə Yerusalem. Nya Yesu nye lə kesumukɔ mfó botsyilamaa, nya besumunyə ninə ku afi eto bateasa ku umə eto beninə bətsyuə díbə wə ɔflo. ²⁸ Nya bəto wə bənkə, “Owoe díte fə əsuəale fɛ feeyifo asa nyamfo? Nya owoe tsya díte fə kusu nko?” ²⁹ Yesu ətə mbuaye nkə, “Tutɛɛ, mɔɔto mi ditiki loni hã. Nya lə bitə ni mbuayɛɛ, mɔɔteyi mi

nwə eto əsuəale əsuə minlə asa nyamfo buyifo.
³⁰ Bətəyi mə kaka Yohanes léfo əsuəale utsyiko fə úfləsə betidi ntu? Əsuəale nyaməə, Onanto ɔflo itsyi lee utidi ete dítə wə kusu?”

³¹ Bétšyiko etiki nyamfo bunə lə mə nti, nya bátɔ mə əsuə bənkə, “Ntsyə ele bə bətəyi kɛɛ? Lə bətəyi boə nkomə eto əsuəale nyamə etsyi Onanto ɔfloɔ, wɔɔɔ bo nkə, ‘Lə nko inii, beso bíamfo Yohanes bənɔ?’ ³² Fɛɛ lə bətəyi wə boə, utidi ete letsyese wə tsyaa!” Balɛ sikpi bote kase bətəyi nko tsya itsyise utsyuə saa áfo óno nkə Yohanes eyifo Onanto eto unyeləkətidi.

³³ Nyaso bátəyi Yesu bənkə, “Bunyi.”

Nya Yesu lətəyi mə nkə, “Mintsya əmbətəyi mi itsyi lə əsuəale nnya minkpe eso fə maafɔ nyamfo buyifo!”

12

*Yesu Átəyi Lekpa Únyə Lə Yudafo Eto Benina
 Əsuə.*

¹ Nya Yesu lətəyi mə lekpa nkə, “Lefe lɔnii, osani utsyuə áfo nte eto eyi eto ɔkuɛ. Nya ókpe ɔkpɔ ótsyilama wə. Nya úləkə dibiyə lə koba əsuə kaka wuukəkə eyibibi nyamə eto ntu ukakpo. Nya óto kalebe kani letaka kaka bookənyə bakase ɔkuɛ əmə. Nya úfi ɔkuɛ əmə ókpe lə wə beyifoyifo bətsyuə eto ani nkə bakase wə, lə lesa nə ke bənyə lə ɔkuɛ əməə, lə befi baboko lə besie bətsyuə. Nya údu úsu kusu. ² Se lefe léyo bə balɛ eyibibi nyaməə, osani əmə ákpe mə wə uyifoyifo ɔni nkə lə boɔle eyibibi nyaməə, lə batsyɛ nya lə akpa ənuə lə osani əmə lə ofo wə

lekpa oboko wə. ³ Fɛɛ beyifoyifo bamfo ko dímuə wə uyifoyifo əmfo báblɛ nya bála wə bátsyese nya údu anifufu. ⁴ Nya osani əmfo disi ótsyese uyifoyifo bamba. Nya se úsuu, beyifoyifo bamfo lɛblɛ wə nya ófo lefabe lə disi, nya bákpe wə kofani tinti. ⁵ Nya osani əmfo disi ótsyese wə uyifoyifo bamba bio, nya báblɛ wuntsya nya bálo wə. Nnya kamaa, usi ótsyese wə beyifoyifo kpə. Nya báblɛ bətsyuə nya bálo bafɛfɛ.

⁶ “Utidi wə dibu wə bio wootsyese wə ni osani əmfo kosate eto ubi lala. Lɛfɛfɛɛ, ótsyese wə. Nya ótɛyi wə əsuə nkə, ‘Mfo nnɔ miə boobu mɔ ubi.’

⁷ “Fɛɛ beyifoyifo bamə átɛyi mə əsuə bənkə, ‘Nyə nwə luudi Bonamute eto bikə. Bibə lə bu-muə wə bolo, lə bɔlɛ wə kedikɔ bofo bofianinsə bo kale.’ ⁸ Nyaso bəmuə ubi əmfo. Nya bálo wə. Bɛfi wə bəduə lə ɔkuɛ əmə eto kama.”

⁹ Nya Yesu lɛtɔ mə nkə, “Bɛ befo bɛnɔ biə osani əmfó ebuyifo? Mɔɔtɛyi mi minkə wuusu mfó usu olo beyifoyifo bamfó, ɔlɛ ɔkuɛ əmfo ofo okpe betidi bambaa kɔni. ¹⁰ Ntɔ bíankla lə Awɔnisa Kenke Eto Kukuə kaka bátɛyi bənkə,

‘Leba nə mba laato ayo leni bə dimbə kɔnɔɔ,
ni bomu díbɛ lefiani nə nso bofe lə afɛfɛ
kenke nti.

¹¹ Bonamute ni nwə díyifo nyamfo.

Iyifo lesa nə laanɔ bobɛ sitinti!’ ”

¹² Nya se bánɔ nyamfoo, Yudafɔ eto beninə ákplatsya kekkeke bə lə bəmuə Yesu. Itsyise bənyə bə lekpa nəmə ótɛyi itsyi lə mə əsuə. Fɛɛ báte sitiditu sia ínyə mfó sikpi. Nyaso bédu lə wə ɔflɔ.

Yudafɔ Eto Beninā Ábio Yesu Uyibi Lə Etiki Ísuə.

¹³ Kamaa, bátsyese Farisifɔ ku Herodes eto betidi bətsyuə lə Yesu ɔflo bə lə besu bətsyue wə etikididi ato lə bənyə kabua lə wə esuə. ¹⁴ Se bésu wə ɔflo, bátɛyi wə bənkə, “Oteasa, buyi boə fəə, ɔnukualetidi feni. Nya eentsyi fə etiki kawuninsə lə ədufə betidi ənə. Aante betidi eto ənəmi sikpi, ɔkplɛ lee, ɔkɛkɛ. Nya ni bə Onanto eto kusu sɛɛ əsuə hã faate saa kayenko. Nyaso tɛyi bo lə ɛkɛkɛ bə boko oko butə Romafɔ eto Okankplɛ Kaisare ¹⁵ Bofɔ lee boamfo?”

Fɛɛ Yesu yi mə nkə ənəmi ənəmi eto betidi beni, nya ɔtɔ mə nkə, “Beso biala biə biato mə bebe? Beboko mə atabi lə mbe.” ¹⁶ Báboko wə ani. Nya ɔtɔ mə nkə, “Owoe eto disi ku diye ntəkə lə nnya əsuə mfo?”

Mfó bətə mbuayɛ bə, “Okankplɛ Kaisare ni.” ¹⁷ Nya Yesu lɛtɛyi mə nkə, “Nyaso bifi lesa nə ni Okankplɛ Kaisare eto lele bitə wə. Lə bifi lesa nə ni Onanto eto lele bitə Onanto.”

Lə nyamfo esoo, iyifo mə naa.

Ditsyukpa Bamba Áto Yesu Bábe Lə Bəkpənkpə Ísuə.

¹⁸ Sadukifɔ bətsyuə əbə Yesu ɔflo. Mə laate bənkə lə utidi əkpəə, woensibusinkli otaka ubə nkpə. Bəbə bə bātɔ Yesu ditiki ditsyuə. ¹⁹ Bátɛyi wə bənkə, “Oteasa, Moses áwɔni lə afi nnya útə bo nkə, ‘Lə osani utsyuə əkpə nya óyani wə usiə utsyə nya bánle bebi saa, nyalɛ ele bə osani əmfo eto ɔyimisani, fi usio əmə ufi. Nya wə ku ɔkɔsiə əmə lə bale bebi. Nya bebi bamfóo, betidi ebunyə mə fe osani wə dimanke ubi saa eto bale.’

²⁰ Nya íbæ lefe lóni bæ, bayimisani ekuanse æsiæ. Ututæ éfi kusia nya úkpæ le lefe næ bánle ubi saa.

²¹ Nya unuæfæ tsya dífi wæ, nya wuntsya díkpæ lefe næ eto lefe wonko usio æmfo dímanle ubi saa. Nko kæ íbæ læ wæ æsuæ bæ banle ubi saa.

²² Nko íbæ bæ mæ ekuanse ba kenke éfi usio emfo bafia. Fæ mæmblæ kenke ækpæ lefe næ mæ ku usio æmfo dímanle bebi saa. Nnya kama kamaa, usio æmfo tsya ækpæ. ²³ Mómóó, nnya ni bænkæ læ lefe næ bækrænkpæ kenke lootaka betsyi ókómæ bæbæ nkpæ, mæ nti eto owœ luudi usio æmfo eto usæ se mæ betidi ekuanse bamæ læ lefe ditsyuæ, dikefi wæ fe kusia?"

²⁴ Nya Yesu díta mbuayæ nkæ, "Inni nko ini kulaa. Nnyæ minkæ bíannó ditiki næmfo kaso, itsyise biannó etiki nya nkpe læ Awónisa Kenke Eto Kukuæ eto kaso nya binyi Onanto eto æsuæale. Nyaso beta wæ bibu. ²⁵ Læ lefe næ bækrænkpæ lootakaa, bootsyæ fe Onanto eto batónkpe, nyaso bambufi bæsiæ nye bæsæ. ²⁶ Nya læ bækrænkpæ eto businkli kataka æsuæ, Moses áwóni lesatsyuæ læ Awónisa Kenke Eto Kukuæ æsuæ itsyi læ biyu eto eyi kpufæ nnya dínyæ utæ æsuæ. Onanto lídi wæ etiki. Lee biankloma? Mfó ówóni nkæ Onanto áteyi wæ nkæ, 'Mó ni Abraham eto Onanto ku Isak eto Onanto ku Yakob eto Onanto tsya.' ²⁷ Nnya kaso ni bænkæ betidi ba díkækpæ ebusinkli bæbæ nkpæ, nya wæ kæ ni mæ Onanto. Fæ mi bíonya onukualesu komfo koko!"

Kofi Eto Oteasa Oni Áto Yesu Nkæ Nte Kofi Ko Nso Bofe Læ Afi Nnya Kenke Nti?

²⁸ Afi eto oteasa wæ dínyæ mfó áno etiki nya banle boteyi. Nya áno nkæ Yesu ætæ etiki nyamæ

eto mbuayε kukɔnɔ. Nyaso ɔnyi ɔsu Yesu ɔflo nya ɔto nkə, “Nte kɔfi ko ni nko nso bofe lə afi nnya kenke nti?”

²⁹ Mfó Yesu leteyi wə nkə, “Kɔfi ko nso bofe ni nko báwɛni bənkə, ‘Israel eto betidi, belɔ bɛnɔ kukɔnɔ! Onanto ni bo Onamute, nya Onanto ɔni hā nkpe. ³⁰ Nyaso ele bə ala Onanto wə ni fə Onamute ku fə utu kenke, ku fə lɛwɔnɔ kenke ku fə nsusu kenke, ku fə əsuəale kenke.’ ³¹ Nya kɔfi ko nsi ntəkə lə nkomfo eto kama ni bə, ‘La fə ɔyimitsyuə fe kase faala fə əsuə.’ Kɔfi saa ensibə ko ntəkə afi nyamfo kato.”

³² Nya osani əmə dítə mbuayε nkə, “Oteasa, áteyi nnya kukɔnɔ! Lesa nə fátəyi eyifo ɔnukualε bə Onanto ni bo Onamute, wə kama Onanto saa ensibə. ³³ Nya ele bə Utidi saa la Onanto itsyi lə wə utu ku wə nsusu kenke ku wə əsuəale kenke. Nya ele bə ola wə utiditsyuə fe kase woala wə əsuə. Eləkε eso bə utidi di afi ənuə nyamfo, eso bə ufi bebuki ku keditətə bamba utə Onanto.”

³⁴ Se Yesu dínɔyə kasɔnɔnɔ ka əsuə osani əmfo lɛyε útə mbuayεε, ɔteyi wə nkə, “Fə alεε, ibu səkε ete lə edufə Onanto eto sekakedikɔ.” Nyamfo eto kamaa, kuutsyuə saa mensi kpe ɔkɔε nkə woato Yesu kulesa tsya.

Nwə Onanto Lékpɔ Ɔhile Utsya.

³⁵ Lefenə Yesu ləkε lə Yudafo eto Disumuyo ɔnlε Anantotiki bote mfóo, ɔto nkə, “Ntsyε ibə fε afi eto bateasa bamə nlε bɔteyi bənkə Utidi wə Nlε Bubəə, ábɔ utsyi Oka David eto kafo? ³⁶ Lɛwɔnɔ Kenke áwunsəko Oka David áteyi nkə, ‘Onanto áteyi mɔ Onamute nkə,

“Siə mfo læ mə kodianu isu ese lefe nə muutə efi fə akpa ətəkə fə balo læ disinti.” ’

³⁷ Nyalɛ læ David kosate læ Utidi wə Nlɛ Bubə bokpo nkə wə Onamutee, nyalɛ ntsyə ibə fɛ wə kosate loofɔ David eto kafo eto ubi budi?”

Nya betidi kpə dɪnyə banlɛ etiki nnya Yesu nyə ɔnlɛ budi bɔnɔ ku disuəyuə.

Yesu Ɛkə Betidi Ato Lə Afi Eto Bateasa Ɔsuə.

³⁸ Se Yesu nɛ betidi bamfó asa botee, ɔtɛyi mə nkə, “Bebe sinini læ afi eto bateasa əsuə. Baala awu kplɛ bokpe nya baala bɔyɛ kafe kaka betidi luunyə mə bəsiəsə ku dibu. ³⁹ Bala nsiəkɔ kplɛ busiə læ Yudafo eto ntsyakɔ ku læ asakedikɔ. ⁴⁰ Bələkə bakɔbəsia kɔhɔ. Kamaa, baalɛ mə bikə kafo. Nya bato kala kentsyɛɛ kate əsuə bə beyi Onanto. Mə kotonənə əbɔkɛ ale eso betidi fɛfɛ eto ale!”

Ɔkɔsia Okombo Utsyuə Ɛtə Asa Nnya Dídufə Onanto Ɛnə.

⁴¹ Nya Yesu dɪkənə úsiə læ kedi kətəkɔ læ Disumuyo kaka banlɛ atabi boko, nya únsi ɔnlɛ bobɛ kase betidi nɛ bofɛ kesu kako asa. Batabinyə kpə áko atabi kpə. ⁴² Nya ɔkɔsia okombo utsyuə tsya díbə ófɛ nya úfi atabi sɛkɛ úsu óko.

⁴³ Nya Yesu lékpadi wə bakasebi utsyə nya ɔtɛyi mə nkə, “Nlɛ mi bɔtɛyi sitinti minkə læ Onanto eto ənəmii, ɔkɔsia okombo əmfo eto atabi nnya óko, édufə ənə eso nnya betidi bamfo kenke léko. ⁴⁴ Sitintii, betidi bamfo kpe kɔni kalende. Fɛɛ nnya nte mə eto sɛkɛ ete baboko. Nya usionko əmfo alɛɛ, ite bə okombo ni tsyaa, ufi lesa nə ntə wə kenke úbə óko. Lesa

nə ele bæ wuufi oya lesa udii, nnya ni lesa nə úfi úbə óko mfo nɛ.”

13

Yesu Áteyi Etiki Ɔtonsə Utsyiko Lə Yerusalem Eto Disumuyo Eto Boba Ɔsuə.

¹ Se Yesu ləbɔ lə Yudafo eto Disumuyo mfóo, wə bakasebi eto ɔni áteyi wə nkə, “Oteasa, be aba nnya laanɔ bobɛ mfo beefi báto diyo kplɛ nəmfo ku kase baato nii! Dianɔ bobɛ!”

² Yesu áteyi wə nkə, “Bɛlɔ bebe diyo kplɛ nəmfo kukɔnɔ, itsyise aba nya béfi báto ni eto lɛɛ lɔni embubu ditəkə lə ni utsyuə əsuə! Diyo nəmfo kenke eboba lekpo lə kasɔ nnya aba nyamfó kenke looba isensə ekpo.”

Yesu Áteyi Mba Ntəkəko Wə Nkə Buubə Bənya Kanyi Balo Mə.

³ Yesu édu úsu úsiə lə Nnuəbi eto Eyi eto Kɔtini komə əsuə. Nya mfóo, úsiə ɔnlɛ Disumuyo nəmə bobɛ katsyese. Nya Petro ku Yakobo ku Yohanes ku Andreas hã díbə wə ɔflɔ nya báto wə bənkə, ⁴ “Onamute, dimamfe ayo nyamfó looba? Teyi bo asa nnya luubə lə bote boə lefe nəmə eboyo bæ nkomə eto asa nyamfo ebubə?”

⁵ Nya Yesu leteyi mə nkə, “Bebe sinini, nya biəntə lə kuutsyuə saa lə ɔwɛ mi okpe. ⁶ Betidi kpə ebubə lə mɔ diye əsuə nya bɔɔteyi mi bənkə, ‘Nnyə mɔ ni nwə bákpo ɔhile əmə,’ nya bɔɔwɛ betidi kpə bakpe. ⁷ Nya yenyifo mi bulə lə bɛnɔ ama eto kɔsɔ lə mi ɔflɔ nye lə katsyontsyokɔ. Ele bæ asa nyamfo eto kakle bæ. Tsyə inni nnya kasɔ ni bənkə kawunsiə eto kalokɔ eboyo.

⁸ Kaso ka ebotaka nka lema. Nya sekakediko ka ebotaka nka lema. Nso ebutinkə lə kalebe saa, nya kukpənsə luubə. Asa nyamfo ebuyifo fe kase kalefo ləənə usionko.

⁹ “Ele bə ibə bə lə mi kosate bimua əsuə bitsyə. Boomuə mi bakpa mi besuko Yudafo eto beninə eto ənəmi. Bɔɔble mi lə ntsyako. Booləkə mi bənyənsə lə baka ku nso eto beninə eto ənəmi lə mɔ disi eso, nya bioteyi mə ditiki itsyi lə mə əsuə. ¹⁰ Tsyə fe kalosəkɔ luubə, yuubə bə batēyi kawunsia eto əsə kenke eto betidi Onanto eto ditiki nəmfo. ¹¹ Nya lə lefe nə bəmuə mi besuko lekpokakpokɔ, biembu disi bətənsə itsyi lə lesa nə bioteyi əsuə. Lə lefe nəmə ayoo, lə bətēyi ditiki nə Onanto eto Ləwɔnɔ lookpe mi kenye nkə bətēyi. Itsyise inni mi kosate ləəbə etiki budi. Bomu Onanto eto Ləwɔni loote mi lesa nə bioteyi.

¹² “Oyimi ebudu oyimi utə bə balo. Nya antomə tsya luuyifo nko ke ku mə bebi. Bebi ebotaka bənyə lə mə antomə əsuə bedu mə bətə bə balo. ¹³ Bookisi mi lə mɔ disi. Fəe utsyuə saa wə luunyə kekleke lə wə bofokano əsuə isu ese kalosəkɔ, Onanto ebuləkə wə utsyiko lə kotonəne ko bətsyə itə babuayifo əsuə.

Yesu Fkə Mə Ato Lə Bule Bo Ləəbə Bubə Əsuə.

¹⁴ “Mɔmɔ, bifə ato lə belɔ bənɔ kukɔnɔ. Lə binyə lesa nə Onanto leekisi nle bubə lə wə Disumuyo kenke, ka nle mfo kɔfiɔ bokpe nya dimanle bə ekə mfoo, betidi ba nkpe lə Yuda tsyetsyi besu babio lə atini əsuə. ¹⁵ Nwə ntəkə lə wə ditsya əsuə, mensi bu disi nkə woayifə ubə ufi kulesa lə wə diyo. ¹⁶ Utsyuə wə nnyə lə okue membu disi nkə wəsinkli ubə oto nkə wəəbə

ufi wə kafia. ¹⁷ Lefe nəmfó ebókε ale tinti itə besionko ba ni bafondε, nye mba nle bebisambi ba nle boyimi. ¹⁸ Bele Onanto lekpakpa bə lefe nəmə məntəkə lə leyɔ lefe! ¹⁹ Itsyise bulə bo luubə lə lefe nəmfóo, əbókε ale lesɔ mbo ke dikəbə bófe saa idu lə kawunsiə eto kasɔ ketsyikokɔ ibə ese mi eto lefe nəmfo. Nya bulə bomfo eto okle ensiembubə inyə kulefe. ²⁰ Fεε Onanto əbətɛyi utsyə nkə wuuləkə eyi nyamə ubu. Itsyise lenni nkoo, kuutsyuə saa embubu usiə. Tsya lə wə betidi ba úkələkə utsyə eso, wuuləkə lefe nəmə ubu.

²¹ “Nyaso lə utsyuə atɛyi fə nkə, ‘Bebe! Nnyə Kristo mfo,’ nye utsyuə tsya nkə, ‘Nyə wə nkpe mmə,’ mamfo anɔ! ²² Itsyise mba luuyifo mə əsuə fe Kristo nye Onanto eto bənyeləkətidi, kpə ebotaka bənyə. Booyifo ayanisa kpə ku asa nnya nkpe sikpi, itə bə lə boofoo, bɔwε Onanto eto betidi ba úkələkə utsyə taa kɔ kulaa tsya bakpe. ²³ Nyaso bimua əsuə bitsyə! Ntɛyi mi lesa saa ntɔnsə fe lə lefe nəmə lə leyo.

Yesu Átɛyi Kase Utidi Eto Ubi Luubə Bio.

²⁴ “Nya lə eyi nnya luutəkə lə bulə bomfo eto kamaa,

‘kofe əmbofa bio,
nya kofande tsya lembuyənde.

²⁵ Befandebi ebuyifo fe bofankli bənle ketsyi kato kəbə kasɔ,

nya kato eto asa kenke luutinkə.’

²⁶ “Lefe nəmfóo, betidi ebunyə mə, Utidi Eto Ubi, nle bubə lə asomiloku əsuə. Nya muubə ku Onanto eto əsuəale lə diyənde kplε əsuə. ²⁷ Nya mootsyese mə kato eto batɔnkpe kawunsiə eto

akpɔ ana nyamə lə nsu nləkə mɔ betidi ba mɪnkələkə mɪntsyə itsyi lə kawunsiə eto lekpake nəmfo isu ese lə kalosəkɔ ka nse.

Yesu Nkə Kuutsyuə Saa Enyi Lefe Nə Wuusinkli Uba.

²⁸ “Bekase asa itsyi lə koto əsuə. Lə ibə bə binyə se kuyi komfó lə afanto fɔfɔ buləkəə, eté mi bə kasɔmite əbɔfi. ²⁹ Nko ke lə ibə bə binyə asa nnya mɪnteyi mi mfo lə kasɔ butsyə ku bubəə, ete biote biə kawunsiə kamfo eto kalosəkɔ əbɔfi nnya ikəbə eyo fə kəsia pɛɛ! ³⁰ Sitinti nlɛ mi bɔtɛyi minkə asa nyamfo kenke ebubə itə fɛ efe nəmfo eto betidi luukpə balo. ³¹ Kato ku kasɔ kenke ebubə kafe. Fɛɛ mɔ ditiki embubə lefe kulefe.

³² “Tsyaa, kuutsyuə saa enyi diyi nye lefe nə asa nyamfo luubə itə, Onanto eto batɔnkpe ku mɔ, Onanto eto Ubi kulaa tsya enyi, enso mɔ Anto hã nyi. ³³ Bebe kukɔnɔ lə bimua əsuə bitsyə itsyise binyi lefe nə nyamfó luubə itə. ³⁴ Mɔ bubə ebuutsyə fe kase osani utsyuə luudu lə wə umə nkə wəəsu kusu, nya óyani wə beyifoyifo utsyə lə diyo. Útə utsyuə saa keyifo ka wuukeyifo. Nnya kamaa, ótɛyi nwə laase wə diyo nkə ɔlɔ ose wə diyo kekleke.

³⁵ “Nko kə ele bə mi tsya muə əsuə binyə. Itsyise binnyi lefe nə mi Oyosate luubə udufə. Yofo bubə bə wuubə ku kakɔmi lefe, nye ntsyetsyi, nye kolensiənto kplɛ ko bekuse lætə kɛnyɛ, nye olesia. ³⁶ Lə ibə bə ubə ofuaa, yanle bə ibə bə ubə unyə mi bɛnlɛ selabe. ³⁷ Lesa nə minlɛ mi bɔtɛyi mfoo, nlɛ nnya bɔtɛyi itə betidi ba ta. Nnya ni bə bimua əsuə bitsyə.”

14

Yudafɔ Eto Batɔnkotɔnko Ákle Bə Bəəmua Yesu.

¹ Ibu eyi ənuə fɛ lə Yudafɔ lə bedi mə eyi nnya baakpo Ukpə Ása Bo Ɔyila ku Nnamfokuã Eto Abolo Eto Eyi, nyna beefi kakloma mə budu lə Egipte. Besumunyə ninə ku afi eto bateasa bətsyuə áke mfó békebu disi lə kusu ko bɔɔye kalɔkalɔ bəmuə Yesu balo. ² Bátɛyi lə mə nti bənkə, “Yanle bə ibə nko lə eyise nyamə eto lefe. Itsyise lenni nkoo, betidi ebunyə ɔblo bataka bəńyə bo lə əsuə ibə ekpe bule.”

Usionko Utsyuə Éfi Nnuəbi Bo Laanyi Fififi Ókpo Yesu Lə Disi.

³ Yesu ésu Betania eto umə lə Simon wə díkefi bufisia únyə eto diyo. Lə lefe nə Yesu nsi mfó ónlɛ lesa budii, usionko utsyuə wə nlɛ nnuəbi bo laanyi fififi eto dituntu nə baakpo alabasta əbə mfó. Baakpo nnuəbi bomfó, bo lefo koya tintii bə naadi. Usionko əmfɔ ásini dituntu nəmə nya ówuninsə nnuəbi bomə ókpo Yesu lə disi.

⁴ Nyamfo ələ betidi ba díńyə mfó. Nya kafo lenyi mə bátɛyi bətsyuə bənkə, “Beso woabiasə nnuəbi bomfo nko? ⁵ Eni ofo mu bote kənyə fe lɛlɛ wɔlɔlɔ eto kayo, ufi usu utə bakombo.” Nyaso bəyənki bákpe wə bákpo wə kudu.

⁶ Nyaso Yesu átɛyi mə nkə, “Beyani wə kpoo! Be so biayani wə lə bɛyɛ wə bulə? Lesa sɛɛ úyifo útə mɛ. ⁷ Bakombo kpe mi lenti lefe saa. Nya biofo mə bɔwunsəko lə lefe nə ke beela. Mɔ alɛɛ, inni lefe saa mɔɔke mi lenti. ⁸ Usionko əmfɔ

éyifo lesa nə wofu buyifo. Úfi nnuəbi bomfo ókpo mə læ əsuə ólo mə utsyə itə muukpə fə buubikə mə. ⁹ Nlə mi bətəyi sitinti minkə kaka ke boobe Onanto eto ditiki sɛɛ nəmə letsya læ kawunsiə kamfoo, bətəyi nnya usionko əmfo tsya díyifo mfo kefi kakloma wə.”

Yuda Átɔnɔ Nkə Wuudu Yesu Utə.

¹⁰ Nyaso Yuda Iskariot wə ni Yesu eto bakasebi lefosi inuə bamə eto ɔnii, ésu besumunyə ninə bamə ɔflo nkə woote Yesu udi utə mə. ¹¹ Əsuə əyuə mə tinti se bánɔ etiki nnya úbə ótəyi mə, nya mə tsya letəyi bə buutə wə atabi. Nyaso Yuda ákabəbɛ kusu ko wɔɔnyɛ ote mə kase boomuə wə.

Yesu Ku Wə Bakasebi Édi Ukpə Ása Bo Ɔyila Eto Lesa.

¹² Lə diyi tute læ Nnamfokuā eto Diyididi nə baalo Ukpə Ása Bo Ɔyila Eto Asamubi læ mə lekpa əsuəə, Yesu eto bakasebi átɔ wə bənkə, “Se faala fə bɔlo butsyə itə Ukpə Ása Bo Ɔyila eto diyise nəmə eto budi?”

¹³ Nyaso Yesu ələkə bakasebi inuə læ mə bətsyuə nti nya ótəyi mə nkə, “Mi bisu umənkpe əmə nya biotsyako utsyuə wə ntsyi ntu ku ɔlɔtsyi. Bitəkəko wə bisu diyo nə əsuə wuudufə. ¹⁴ Nya læ bətəyi Oyosate əmə biənkə, ‘Oteasa əmə læ bətəyi nkə, te bo diyo nə kafo wonko wə bakasebi luubə bedi mə lesa læ Ukpə Ása Bo Ɔyila Eto Diyise nəmə əsuə.’ ¹⁵ Mfóo, woote mi diyo nə læmɔ kafo læ diyo nəmə eto abanslo kaka bálɔ asa bətsyə kukɔnɔ itə bo.”

16 Bakasebi bamfo édu búsu umə, nya bənyə lesa saa fe kase Yesu ləteyi mə. Nya béyifo Ukpə Ása Bo Ɔyila əmfo eto lesa nəmə bətsyə mfó.

17 Se ditsyitsyo lefe léyoo, Yesu ku wə bakasebi lefosi inuə bamə ésu mfó. 18 Nya lə lefe nə bénsi bánle búdi, Yesu áteyi nkə, “Nlɛ mi bəteyi sitinti minkə mi ɔni wə bonko wə nlɛ kɔni bokpe lə ɔkpe kedi lesa mfoo, ebote mɛ udi.”

19 Ditiki nəmfo éyifo mə buɛɛ ku sikpi, nya bətsyiko wə bɔtɔ ɔni, ɔni, bənkə, “Sitinti, nyi miə inni mɔ ni fanle, lee mɔ ni?”

20 Yesu ətə mbuayɛ nkə, “Mi lefosi inuə eto ɔni ni. Nya ni bə bonko wə nlɛ kɔni bokpe lə ɔkpe ɔni mfo kedi. 21 Mɔ, wə ni Utidi Eto Ubi ebukpə fe kase bəwɔni bəkpe lə Awɔnisa Kenke Eto Kukuə əsuə. Fɛɛ ilə mɛ itə futsyə əmə itsyise woəbə ohiã bunyə fefe. Lə nnya ete bánle utsyə əmfóo, eni yɔɔlɛkɛ esol!”

Bonamute Eto Ditsyitsyosa Fefe.

22 Lə lə lefe nə bánle lesa búdi, Yesu éfi abolo ətsyuə. Nya lefe nə úkasɔ Onanto anii, úbudi nnya wɛlɛwɛlɛ nnya úsie ni útə wə bakasebi. Nya ɔteyi mə nkə, “Befo nyamfo lə bidi. Nyamfo ni mɔ usuə eto sinə nɛ.”

23 Nya úfi lekɔbe ku nte, nya se ɔsɔ Onanto anii, úfi útə mə nya bənə.

24 Nya ɔteyi mə nkə, “Nyamfo ni mɔ kɔtɔ ko muufi ntə lə betidi kpə eto disi, ko Onanto luufi uyifo ketsyue fɔfɔ lə wə ku wə betidi eto nti. 25 Lə ɔnukuale əsuəə, mensiəmbunə nte fɔfɔ bomfo bio, isu ese lefe nə muunə nte fɔfɔ bomfo eto okle lə Onanto eto sekakediko.”

²⁶ Nya bése kusə béfi bátəsə Onanto nya bédu bésu Nnuəbi eto Eyi eto Kətini.

Yesu Áteyi Utsyā Nkə Petro Eboni Wə.

²⁷ Mfó Yesu leteyi wə bakasebi nkə, “Mi utsyuə saa ebutsyetsyi óyani mə utsyə. Itsyise Onanto áteyi lə Awónisa Kenke Eto Kukuə əsuə nkə, fe kase bəwóni bətsyə bə ‘Moolo nwə laase basamu bamə, nya wə basamu luusənsə.’

²⁸ Εε lə ntaka ntsyi lə əkómə mbəə, mōōtō mi nsu Galilea.”

²⁹ Nya Petro leteyi wə nkə, “Mō alə məmbutsyetsyi ndu fə lə ɔflɔ kulefe, lə ibə bə bafefe kenke ebuyifo nko kulaa tsya.”

³⁰ Yesu áteyi Petro nkə, “Nlɛ fə bətəyi sitinti minkə fe ukusɛ luutə kenye dinuəfə lə kətsyə kamfoo, fə kosate əboni mə sitsyə.”

³¹ Petro esi óse wə uyi óka ntamu óteyi nkə, “Lə ibə bənkə balo bonko fə tsyaa, məmbóni fə nteyi minkə minyi fə.” Nnya ke wə bakasebi bamə tsya leteyi nɛ.

Yesu Áto Ola Lə Bulə Ɔsuə Lə Getsemane.

³² Nya bédu Getsemane. Nya Yesu leteyi wə bakasebi nkə, “Bisiə lə kasɔ mfo lə nsu nto ola.”

³³ Nya ókpa Petro ku Yakobo ku Yohanes óyenko. Nya se lesa nə nlɛ wə bubə lə əsuə nlɛ wə bulə esoo, ³⁴ ótsyi ówininsə nya óteyi mə nkə, “Nyamfo lɛ mə bulə lə utu ku kanyinyənyə itə ukpə. Bianlabe selabe. Bińyə bisəkə mə mfo.”

³⁵ Se ónyi úsu sɛtɔ sɛkɛɛ, ókpo lə kasɔ nya óto ola ólɛ wə anto lekpakpa nkə, “Lə yuuyifo fə lelábii, nyalɛ tə bulə bomfo lə bofe mə.” ³⁶ Nya

ótèyi nkə, “Mɔ Anto, Onanto! Aafo lesa saa buyifo. Lə aalaa, nyalɛ takasə bulə bomfo lə mɛ əsuə. Tsya inni lə mɔ lelabi əsuə bomu lə fə lele əsuə.”

³⁷ Lefe nə úsinkli úbə wə bakasebi itsyə bamə ɔflo, úbə únyə nkə bálabe selabe. Nya óto Simon Petro nkə, “Simon, selabe fanlɛ? Əmbofo ənə butəkə lebombosɔɔ lɔni kplon tsya ete?”

³⁸ Nya ótèyi mə nkə, “Bitəkə ənə bisia bikato ola bə biəmbudufə lə botoo kabe əsuə. Lɛwɔnɔ nəmə lɛ bola, fɛɛ əsuəale əmbə.”

³⁹ Úsinkli úsu bio nkə weesu oto ola fe ditute ke. ⁴⁰ Úsinkli úbə wə bakasebi ɔflo bio nya usi úbə únyə nkə besi bále selabe. Bánlɛ mə ənəmi bofo buminkli. Nya bántɛ lesa nə bótèyi wə lə nnya əsuə.

⁴¹ Se úsinkli úbə ditsyəfəə, óto mə nkə, “Bola bela biə bialabe bitsyə ɔnwɛ? Isia, betaka! Lefe nəmə eboyo. Bebe! Ubə mɔ, Onanto eto Ubi, bufi kakpe babuayifo eto ani. Bebe məə, se baankpee kusu banlɛ bubə. ⁴² Betaka lə busu botsyako mə. Bebe nwə dífi mɛ ókpe mə lə ani nlɛ bubə.”

Bəmuə Yesu.

⁴³ Mə ku Yesu si bənyə mfó bále etiki fɛ Yuda wə ni lefosi bakasebi inuə bamə eto ɔni díbə. Besumunyə ninə ku afi eto bateasa ku umə əmə eto beninə kpə ətəkəko wə bəbə. Bétsyi keyi ku nlanle.

⁴⁴ Nwə dídu wə útə mfóo, ébótèyi betidi bamfo utsyə nkə, “Utidi wə biunyə muusiəsə mfiɔ lə kolaa, wə ni nwə əmə nɛ. Bimuə wə, lə bekpa wə bidunko.” ⁴⁵ Nyaso se Yuda leyɛ úsu útu Yesu, ókpadi wə nkə, “Oteasa!” Nya ófiɔ wə

lə kola. ⁴⁶ Nyaso bəmuə Yesu nya bákobe wə kekleke. ⁴⁷ Nya mba dínyə lə Yesu oflo eto ɔni díləkə wə kalanle nya óla Usumunyə Ninə Kenke eto odomunyə eto koto.

⁴⁸ Nya Yesu leto mə nkə, “Beso ele bə bitsyi keyi ku nlanle fe lə bibə bimuə me lə əsuale əsuə fe uyu mini? ⁴⁹ Bo ku mi ete ləkə lə Disumuyo mfó diyi saa, nya minke mfó mínkate Anantotiki nyamə mfó tsya bíəmmuə me. Bə lə kase Onanto eto Awɔnisa Kenke Eto Kukuə leteyi utsyə, lə ibə itə nko.” ⁵⁰ Nya wə bakasebi kenke dítsyetsyi báyani wə bətsyə.

⁵¹ Lə lefe nəmə mfoo, okosobi utsyuə wə nti kafia əsuə ntəkəko wə, ənyə lesa nə kenke díbə. Bamamanyə bamə ála lə bəmuə okosobi əmfo. Fe ini wə kafia ete bákobe, nya ókpɔ ⁵² óbɔ mə lə ani. Nya útsyətsyi údu leyaleya. Nya óyani wə kafia ókpɛ mə lə ani.

Bákpa Yesu Bésuko Yudafɔ Eto Beninə Eto Ɔnəmi.

⁵³ Nya bákpa Yesu bésuko Usumunyə Ninə Kenke eto diyo. Mfó nya besumunyə beninə bamə ku umə eto beninə ku afi eto bateasa létsya bénsi. Mə ni Yudafɔ eto beninə. ⁵⁴ Petro ətəkəko mə kama kama nya úsu údufə lə usumunyə ninə eto diyo nəmə. Nya úsu úsiə lə bamamanyə bamə oflo ónlɛ ute bəyifə.

⁵⁵ Besumunyə ninə ku Yudafɔ eto beninə kenke ba dísiə mfó ákplatsya babe lə boofɔ kabua kətsyuə bunyə lə Yesu əsuə lə bayɛ bəmuə wə balo. Tsya bəmfo kabua saa bunyə lə wə əsuə.

⁵⁶ Betidi kpə əbə bedi etiki bátɛyi bidia lə wə

əsuə, tsyaa mba díbə eto etiki áta ibu læ bətsyuə əsuə.

⁵⁷ Nya bətsyuə létaka bətəyi nya bála wə kenye bənkə, ⁵⁸ “Bɔnɔ bə ótəyi nkə, ‘Mooba Onanto eto Disumuyo nə báto mfo, tsya læ diyi tsyəfə əsuə, muusinkli nto lebamba nə bémfi betidi eto ani báto.’ ” ⁵⁹ Fɛɛ mə tsya eto etikididi mánkate ku mə bətsyuə eto ale.

⁶⁰ Usumunyə ninə kenke átaka únyə læ mə nti nya ótɔ Yesu nkə, “Anlɛ etiki nnya banlɛ bɔtɔ bɔnɔ? Embutə mbuayɛ? Be nkpe fə fɔtəyi?”

⁶¹ Tsyə Yesu édi bi, wémfə kenye ótəyi kulesa.

Usumunyə ninə kenke əmfo esi ótɔ wə nkə, “Fə ni Nwə mə Bákpro Ɔhile, Onanto əmə boatesə eto Ubi?”

⁶² Yesu átəyi wə nkə, “Mɔ ni. Nya biuunyə Utidi Eto Ubi se unsi læ Ɔsuəaletidi Onanto eto kodiani. Nya biuunyə se unsi læ asɔmiloku utsyi kato ɔnlɛ bubə!”

⁶³ Lə lefe nəmfó tututuu, Usumunyə Ninə Kenke əmfo kosate ko léfuadi wə awu ku lɛblɔfi ótəyi nkə, “Fənkə bee? Badansiɛ sa nńsife itə bo bio itsyi læ mba ńyə mfo kama! ⁶⁴ Údi mbusiotiki únyə læ Onanto əsuə! Ntsyə binyə læ wə əsuə?”

Nya məmblɛ lɛtɔnɔ bálo wə dikpi bə ele bə ukpə. ⁶⁵ Mə nti eto bətsyuə étsyiko ntufə butufə kákpro Yesu. Nya bákɛ wə ənəmi nya bətsyiko wə bɔsɔ. Nya bánlɛ wə bətəyi bənkə, “Təyi bo futsyə lɛsɔ fə!” Nya bamamanyə bətsyuə lékpa Yesu bédunko, nya básɔ wə læ atosi.

Petro Étudi Kenye Lə Yesu Ɔsuə Nkə Unyi Wə.

⁶⁶ Lə lefe nəmfó, Petro ébubə úsi læ Usumunyə Ninə Kenke əmə eto diyo fə usiobi wə

nkpe wə lə ɔflo díbə. ⁶⁷ Lefe nə únyə Petro nsi lə uté ɔflo ɔnlɛ wə bɔyifəə, ɔteyi wə nkə, “Fintsya ébutəkəko Yesu Nasaretnyə əmə ənyə!”

⁶⁸ Nya Petro dítudi kenye ɔteyi nkə, “Bee? Mánno lesa nə fanle bɔteyi mfo eto kasɔ!” Nya ɔtaka údu úsu únyə lə kesia ɔflo. Kase óyo kəsia kamə ko ukusə ko dítə kenye.

⁶⁹ Usiobi əmfo esi úbə mfó úbə óbe wə, nya usi útsyiko betidi ba dínyə mfó bɔteyi nkə, “Osani əmfo eyifo mə nti eto ɔni!” ⁷⁰ Tsyə Petro esi útudi kenye nko ke.

Yankle fɛ mba ńyə mfó leteyi wə bənkə, “Yanle bə ani fə enni mə ɔni, itsyise fintsya etsyi Galilea eto kasɔ.”

⁷¹ Nya Petro léfa ɔteyi nkə, “Ekpe lə Onanto bə lə sidia minle bɔteyii, lə unə mə koto! Mínyi utidi əmə əsuə bɛnlɛ etiki budi ketsyiko mfo!”

⁷² Lamfolamfo, ukuse ko disí útə kenye dinuəfə, nya Petro lékloma nkə Yesu áteyi wə nkə, “Fɛ ukuse luutə kenye dinuəfəə, əbutudi kenye sitsyə fə enyi mə.” Nya ílə Petro lə utu nya úwi keku.

15

Bákpa Yesu Bésuko Pilato ɔflo Lə Bakponko Wə Lekpo.

¹ Olesianto əmfóo, besumunyə ninə, átsya ku Yudafɔ eto beninə ku afi eto bateasa ku Yudafɔ eto batɔnkɔtɔnko kenke. Se béfi nsusu lə etiki nyamə əsuə ku kase bɔɔye ku nnya. Bákple Yesu nya bákpa wə bésuko Aba eto Unyɛsiə Ninə itə Romafɔ eto Aba wə baakpo Pilato ɔflo.

² Mfóo, Pilato áto Yesu nkə, “Fə ni Yudafə eto Oka?”

Yesu átəyi wə nkə, “Ee, lə kase fanlə bətəyi.”

³ Besumunyə ninə bamə ála etiki kpə bətəkə Yesu. ⁴ Nyaso Pilato esi óto wə nkə, “Ěmbuləkə kənyə lə etiki saa əsuə? Tsyue koto lanə etiki nnya banlə bətəyi lə fə əsuə!”

⁵ Tsyə, Yesu ménsitəyi kulesa, nyaso íyifo Pilato yanii!

⁶ Lefe saa lə eyo nkomə eto diyididi əsuə, íyifo Pilato eto lekpa nə ókayani betidi bua ba bákpe lə diyo eto oní wə bála kətə mə. ⁷ Lə lefe nəmfóo, bəmuə osani wə baakpo Baraba bákpe le diyo. Úyifo futsyə ləkə lə betidi ba létaka bənyə lə Romafə eto Aba əsuə nti. Nya lə kudu ko bákpo bələ betidi ku betidi ba bálo esoo, bəmuə wə ku mba dítəkəko wə bákpe lə a Aba eto diyo. ⁸ Nyaso se betidi kpə díbə bətsyaa, bətəyi Pilato bənkə okloma kase wəənyə mba baakpe lə ayo kaminsə fe kase wókala buyifo lele saa.

⁹ Óto mə nkə, “Bela biənkə nyani Yudafə eto Oka əmə ntə mi?” ¹⁰ Pilato áto mə nko itsyise óte nkə kekisi əsuə eso besumunyə ninə lékpa Yesu báboko wə əflə. ¹¹ Nya besumunyə ninə bamə lídi betidi bamə bákpe bənkə bətəyi Pilato bənkə, óyani Baraba bomu utə mə.

¹² Pilato esi údi betidi eto ditsyukpa nəmə etiki nya óto mə nkə, “Be bela biə nyifo ku utidi əmə biakpo biə Yudafə eto Oka mfo?”

¹³ Nya báfa bətəyi wə bənkə, “Sə wə lə uyikabie əsuə!”

14 Pilato átɔ mə nkə, “Nte kabua ka úyifo eso?” Tsyá, məmblɛ esi báfa bembembe bátɛyi bənkə, “Sɔ wə amanklasə lə uyikabie əsuə!”

15 Se Pilato léla nkə weeyifo lə mə lelabi əsuə esoo, óyani Baraba útə mə. Nya útə béfi kekuefiofió báblɛ Yesu, nya úfi wə ókpe lə bamamanyə eto ani nkə besu basɔ wə bamanklasə lə uyikabie əsuə.

Bamamanyə Bamfó Ákpe Yesu Kofani.

16 Bamamanyə bamə ákpa Yesu bésuko Aba eto Unyɛsiə Ninə eto diyo nya bákpadí bama-manyə fɛfɛ bə bəbə mfó. 17 Nya béfi kafia sia eto awu bákpe Yesu fe Oka nya báyifo biyu eto lekpa kpa bėti wə lə disí fe lekankpa kpa. 18 Nya banlɛ wə kɔfió bokpe ákatɛyi bənkə, “Yuu, yuudu,! Yudafo eto Oka lə usiə nkpə kentsyɛɛ!” 19 Bəsɔ wə lə disí ku lekete nya bétufə ntufə bákpo wə lə əsuə. Nya báse akonki lə wə oflɔ bákpe disí kasɔ ku dibu bətə wə. 20 Se bəmə wə nya bákpe wə kofani bálósə, bələkə awu sia nyamə lə əsuə nya bésinkliko nnya ókpe kɔ bákpe wə. Nya bákpa wə bésuko kaka bəsɔ wə bamanklasə lə uyikabie əsuə.

Básɔ Yesu Bámanklasə Lə Uyikabie Əsuə.

21 Lefe nə bántɔɔ, bátisyo ko osani wə baakpo Simon wə ditsyi dibutu óntɔ lə Yerusalem. Nyaso bamamanyə bamə áhiɛ wə bənkə ɔwunsəko Yesu lə utsyinko wə uyikabie əmə. Simon əmfó etsyi Sireni eto kasɔ, nya wə bebi ní Aleksandra ku Rufo. 22 Bákpa Yesu bésuko kaka baakpo Ditidisikobe. 23 Mfó bətə wə nte bo bátisyakasə ku kofa ko loobokosə kanyinyənyə kamə kasɔ bə

unə, fεε Yesu áni wənəə. ²⁴ Nnya kamaa, bamamanyə bamə áso wə bāmanklasə lə uyikabie əsuə. Nya bəfi afetu bákpo básε lə bate lekpa nə luutu utsyuə saa fε bésense awu nyamə bətə bətsyuə.

²⁵ Básɔ wə bamanklasə lə uyikabie əsuə lə olesia əmfó eto abombo ɔwɔnɔmbə lefe. ²⁶ Nya bávɔni asa lε otabo kεkε əsuə básɔ lə wə disi kato nnya nɛ bote lesa nə eso bálo wə ni bənkə, “Ényə Yudafo Eto Oka.”

²⁷⁻²⁸ Nya básɔ beyu inuə tsya lə eyi əsuə bávunsə lə Yesu əsuə. ɔni áfaka lə wə kodiani eto kutsyə nya ɔni tsya léfaka lə kəməni.

²⁹ Mba kenke leyε mfó bafe étinkəsə mə esi bákpe Yesu kɔfiɔ bátɛyi bənkə, “Éhεε! Inni fə létɛyi fə eboba bo Disumuyo kplε akpo lə kasɔ esinkli ato kə lə eyi ətsyə əsuə kεε? ³⁰ Yifə əbə kasɔ lə ələkə fə əsuə etsyiko ukpə eto ani lə bobe!”

³¹ Nko kə basumufɔ ninə ku afi eto bateasa bamə tsya dímə wə bátɛyi mə bətsyuə bənkə, “Úləkə betidi bamba utsyiko lə ukpə əsuə, fεε wembofo wə əsuə buləkə ketsyiko lə ukpə əsuə!

³² Lə wə baakpo Israelfɔ eto oka, wə ni Kristo əməə, wə Onanto Lékpɔ ɔhile Utsyə sitintii, uləkə wə əsuə lə ɔyifə lə uyikabie əsuə ubə kasɔ bə lə bofo bɔnɔ!” Betidi inuə ba básɔ bafakasə lə eyikabie əsuə ku Yesu mfóo, tsya áka wə.

Yesu Ékpə.

³³ Se éyo kakɔmi lefee, kasɔ mfó kenke ko léna. Nya ítsyə nko ísu ése abombo etsyə. ³⁴ Nya lə lefe nəmfóo, Yesu áfa bembembe ótɛyi nkə, “Eli, Eli, lama sabaktani?” Etiki nyamfo eto kasɔ ni

bə, “Mɔ Onanto, mɔ Onanto! Beso fáyani mə fətsyə?”

³⁵ Betidi bətsyuə dínyə mfó áno lesa nə óteyi, nya báteyi bətsyuə bə, “Óle Onanto eto Unyeləkətidi Elia bokpadi.”

³⁶ Mə oni étsyetsyi úsu úfi okosa wə bákpe lə ntə eto sonkpe əsuə nya óbesə wə kato ku uyi útə Yesu nkə unə. Nya óteyi bafefe nkə, “Bínyə lə bobə! Bitə lə bobə lə Onanto eto Unyeləkətidi Elia ebubə uləkə wə utsyiko lə uyikabie komfo əsuə!”

³⁷ Nya Yesu léfa bembembe nya úkpə.

³⁸ Lə lefe nəmfó əsuə tutuutuu, kafia kplə ka léfakanya kėti Yudafo eto Disumuyo eto Kakenkəkə Kenke eto ənəmii, léfuadi lə akpa ənuə itsyii kato ibə kasɔ.

³⁹ Nya se omamanyə ninə wə dínyə lə uyikabie əmə oflo lenɔ Yesu eto bofa nya únyə kase úkpəə, óteyi nkə, “Sitinti utidi əmfo eyifo Onanto eto Ubi.”

⁴⁰ Besionko bətsyuə tsya ənyə kəsese bákabe. Maria Magdalene ku Salome ku Maria nwə eto bebi ni Yakobo kəkə ku Yosef, akə mə lenti.

⁴¹ Lefe nə Yesu ləkə lə Galileaa, mə dítəkəko wə bákawunsə ko wə nɛ. Besionko bamba kpə ba dítəkəko wə bəsu Yerusalem tsya ənyə mfó.

Bébikə Yesu.

⁴² Asa nyamfo əbə lə diyi nə bəəmuə əsuə itə bə lə kofe edufə diyoo, lə bedi ɔnweditsyəyi eto diyi. Nya se kale nle boloo, ⁴³ Yudafo eto okpronkpo ɔni wə baakpo Yosef wə ditsyi Arimatea eto uninə, ákpe ɔkɔɛ úsu únyə Pilato. Yosef éyifo Yudafo eto Uninə kplə wə ləkə dibu nya úkabe

kusu itə Onanto eto Sekakedidi eto bubə. Se óyo Pilato oflɔɔ, óle wə lekpa kpa nkə utə wə kusu læ usu uləkə Yesu eto ɔkɔ əmə usu ubikə fe læ eyo ɔnwɛditsyayi əmə. ⁴⁴ Se Pilato lenɔ nkə Yesu ébukpə kokoo, íyifo wə naa. Nyaso ókpadi wə omamanyə ninə wə dínyə læ etsyuesa nyamfó eto kɛnyɛ, nya ótɔ wə læ sitinti ini bə Yesu ébukpə koko. ⁴⁵ Nya se uninə əmfɔ lɛtɛyi wə nkə ɔnukuale inii, Pilato ətə Yosef kusu nkə usu uləkə ɔkɔ əmə.

⁴⁶ Nya Yosef dísu úləkə Yesu eto ɔkɔ nya úfi kafia kpa fɔfɔ ka óya úmli wə. Nya úfi wə úsu úbikə læ kudi ko bələkə læ koba kəmiə bətsyə koko læ kɔtini oflɔ. Nya útə nkə baminansə leba kplɛ lɔni beti læ kudi komə eto kɛnyɛ. ⁴⁷ Lə lefe nəm fóo, Maria Magdalene ku Maria wə ni Yosef eto ambe ənyə mfó nya bábe kaka bəbikə Yesu eto ɔkɔ əmə.

16

Yesu Átaka Utsyi ɔkɔmə.

¹ Kəsiasə eto ditsyitsyoo, lefe nə békedi ɔnwɛditsyayi bálɔsə, Maria Magdalene ku Maria wə ni Yakobo eto ambe ku Salome ésu báya nnuəbi bo laanyi fififi bənkə beesu bediki Yesu eto ɔkɔ. ² Nyaso se kale dísiə kɔsida eto olesiyə, bətaka bésu kudi komə eti.

³⁻⁴ Se bántɔɔ, bákato mə bətsyuə bənkə, “Owoe buunyə ləminansə leba kplɛ nəmə læ kudi komə eto kɛnyɛ utə bo?” Bátɔ mə əsuə nko itsyise leba nəmə amɔ tinti. Nya se bésu bédufə mfóo, bənyə bənkə futsyə ébubə óminansə leba nəmə læ mfó. ⁵ Nyaso se bédufə kudi komə kafoo,

bənyə okosobi utsyuə se únsi læ kodiani. Nya ónkpe awu nnya diflubi futututu! Difufu əmuə mə.

⁶ Nya okosobi əmə lətəyi mə nkə, “Biante sikpi! Nyi minkə Yesu Nasaretnyə əmə bənle bəbəbə, nwə básɔ báfakəsə læ uyikabie əsuə. Umbə mfo! Ótaka okpe nkpə! Bebe! Mfo bálabesə wə nɛ. ⁷ Nyaso bisu bətəyi wə bakasebi ku Petro tsya biənkə, ‘Yesu tɔ mi sɛtɔ, ɔtɔ læ Galilea. Mfó ti biunyə wə fe kase ótəyi mi utsyə.’ ”

⁸ Nyamfo ákpe besionko bamə difufu, nya bédu læ kudi komə ɔflɔ ku ketinkə, bántə lesa nə beeyifo, nya bákpe etsyi ani. Kase bánkpe læ kusu bántɔɔ, bántəyi kuutsyuə kulesa, itsyise sikpi əmuə mə.

Yesu Ələkə Əsuə Óte Maria Magdalenyə.

⁹ Se Yesu létaka utsyi ɔkɔmə Kɔsida komfo eto olesiyə, utidi tute wə úləkə əsuə óte ni Maria Magdalenyə, nwə əsuə óla awɔnɔ bua akuanse utsyiko læ lefe nə ditsyuə əsuə. ¹⁰ Úsu ótəyi Yesu eto bayetsyuə ba nle nku buwi læ wə ukpə əmə eso. ¹¹ Nya se Maria lətəyi mə nkə Yesu kpe nkpə nya únyə wəə, bámfo wə báno.

Yesu Ələkə Əsuə Óte Bakasebi Inuə Bətsyuə Lə Kusu.

¹² Nyamfo eto kamaa, Yesu ələkə əsuə óte bakasebi inuə læ lefe nə bánye læ kusu bántɔ. Fɛɛ bənnə wə bətsyə lekpo mlə. ¹³ Kama se bésu bátee, bésinkli bésu bátəyi bafefɛ. Tsyaa, mbamə mámfo mə báno.

Yesu Ɛlækə Wə Ɔsuə Óte Bakasebi Lefosi Ɔnwɛ Bama.

¹⁴ ƐƐƐƐƐ, Yesu əlækə wə əsuə óte wə lefosi bakasebi ɔnwɛ lə lefe nə bénsi bánlɛ budi. Nyaso únyenki ókpe mə lə kase mə bofokanɔ ləmbə ale, nya betidi ato fefe, se bamfó betidi ba díkənyə wə se ótaka utsyi ɔkɔmə úbə nkpə bofo kanɔ.

¹⁵ Ɔtɛyi mə nkə, “Bisu kawunsiə kenke lə bebe Onanto eto Ditiki Sɛɛ nəmə ditsya bitə betidi ba kenke. ¹⁶ Utidi wə lefo Ditiki Sɛɛ nəmfɔ ɔnɔ nya utə bəəfləsə wə ntuu, Onanto ebufi wə abua ɔtsyə wə. Nya utidi wə dimamfo ɔnɔɔ, Onanto embofo wə. ¹⁷ Nya Onanto ebutə bafokanɔfɔ lə mɛɛ, əsuəale beyifo ayanisa kpə. Boola awɔnɔ bua lə mɔ diye əsuə. Bɔɔtɛyi belebele kpə bia benyi. ¹⁸ Nya lə bəmuə owa nye bənə kenii, yembuyifo mə kabua saa. Lə bətəkə befimfi anii, boomuə ale.”

Onanto Akpa Yesu Usuko Kato.

¹⁹ Lefe nə Bonamute Yesu dídi mə etiki ólosə mfó eto kamaa, Onanto étsyi wə úsuko kato kaka wuunsi lə kakplekɔ lə wə Anto ɔflɔ lə kodiani.

²⁰ Nya wə batɔnkpe létsyilama nlebe saa kenke bátɛyi Ditiki Sɛɛ nəmə. Nya Onamute əmə dísiə ko mə ówunsəko mə nya bəyifo ayanisa nnya lete bə mə ditiki nəmə eyifo ɔnukualɛ ɛyɛ lə ayanisa kpə nnya bəyifo əsuə.

Onanto eto kakle ɔɔɔ; Sɛkpɛle
Sekpele: Onanto eto kakle ɔɔɔ; Sɛkpɛle New
Testament

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

5fc03d2a-3cf8-5607-a6e0-9e1e197140bd